

焦太史編輯國朝獻徵錄

焦太史編輯國朝獻徵錄卷之一百二目錄

雲南

布政使

潘原明

應履平

袁愷

徐贊

王俊民

黃昭道

陳善

叅政

楊鐸

子溪附

黃皞

朱應登

陳觀

李渭

參議

趙忠

按察

劉鈺

張翥

張憲臣

副使

徐觀

陳政

陳騏

朱文

賀元忠

孫繼芳

申綸

楊逢春

曹達

楊道亨

僉事

邵玉

林淮

林希元

張澤

經歷

劉遠先

知府

杜棠

朱繼祖

龐嵩

鄭溥

戴鰲

王好學

劉容

齊柯

同知

彭鏡初

知州

高斗南

譚讓

林挺春

潘絲

知縣

虎臣

賀朝用

教授

周奕

山陰張汝霖

全校

吳興茅元儀

錢塘徐象標

梓行

目錄

焦太史編輯國朝獻徵錄卷之一百二

雲南

布政使

署雲南布政司潘原明傳

黃金

潘原明楊之泰州人初與僞吳張上誠俱起鹽徒元
兵圍高郵士誠與十八人突圍出走原明反李伯升
呂琛等與焉後仕士誠爲浙江行省平章守杭州歲
丙午十一月右丞李文忠師至錢塘原明遣員外郎
方彝詣軍門納款文忠問之對曰天兵如雷霆當者
無不齏粉百萬生民聞之莫不震懼及聞將軍布德

勞來雜犬弗驚皆曰王者之師也以民情如此天意可知不如乞降有更生之望文忠遣歸明日原明卽以款狀來曰嬰城固守乃受任之當爲歸款救民亦濟時之急務竊伏自念起身草野叨位省樞非心慕乎榮華乃志存于康定豈意邦國殄瘁王師見加意事雖晉于見幾民實同于歸義念是邦生靈百餘萬比年物故十二三今旣入於職方欲溥覃於天澤謹將杭州土地人民及諸司軍馬錢糧之數以獻并執叛將蔣英劉震出降凡得兵三萬糧二十一萬馬六百疋上以原明全城歸降民不受戮授行省平章

其官屬皆仍守舊職士誠由是勢孤以至于亡洪武
三年既封功臣上于原明欲優待之命食其祿不
署事子孫世襲指揮同知十一年定省臺等官歲祿
之數原明每歲給七百五十石于官田內取之十四
年大兵平雲南擇名臣重望者鎮其地以原明署布
政使司事與梅思祖同心撫輯民夷安之十五年十
一月卒柩還賜葬鍾山之陽

雲南左布政使應履平傳

履平浙江奉化縣人由進士歷任德化知縣稽勲郎中獻河清賦陞德安知府秩滿陞貴州按察使正統中奉勅同尚書王驥平麓川苗寇進雲南左布政使尋乞致仕爲人剛直不阿所至祛除奸竇民多便之且嘗論列時政多見采納

雲南左布政使袁愷傳

袁愷字舜舉其先安丘人占籍華亭愷少貧獨學時
出事賈販不爲人知年二十七始棄去厲志讀書入
府學爲弟子員教官以其晚學易之愷自若也未幾
進士授刑部主事推總三法司事陞江西按察僉
事改廣東所至有聲人始奇之江西賊圍西貢縣長
洲村愷率兵往捕時賊勢方熾或請宜少退愷下馬
令曰吾在此汝何敢不力叱使進攻克之巡撫葉文
莊知其才委起調狼兵兵懾不敢肆又率偏師駐全
州督軍餉贊畫梧州總府多所裨益都御史韓雍征

大藤峽愷躬環甲冑冒矢石以從時皆壯之賊平錄
功有寶鈔文綺之賜擢廣東按察使進右布政使遷
雲南左布政使未至辛愷居官廉不爲身謀出仕三
十年家無餘積卒之日橐中蕭然在鄉里任真履素
不以勢位自居出入乘扁舟從一二蒼頭兒者不知
其貴人也時以此高之子珉孫讚皆以能書授中書
舍人直文華殿

雲南左右政使徐公贊傳

徐贊字朝儀浙江永康人嘉靖間任按察使丁亥冬
土舍安銓叛雲南久安忘備報至上下咸以爲憂公
曰醜虜敢行稱亂者謂我軍非其敵耳今以夷攻夷
成擒有日矣總鎮撫按諸公知公才識凡有所圖悉
以諮公乃議調元江蒙化鎮沅等處夷兵佐以漢軍
呈委諸僚分統進勦已獨留中議處糧餉閱習召募
事皆立具晝夜登賊狗師至營衣食於是計立招降
大旗陰誘脇從仍造小旗千餘大書同心協力各保
身家八字于上令各聚執聽撫緣是歸降交至賊勢

日衰時沍寒民多凍餒公復捐俸爲粥食之仍請撫
臣大發倉廩全活者以億萬計戊子春土舍鳳朝文
繼叛與安銓合焚劫屠掠兇威益熾遂進圍省城將
肆焚戮上下震恐公登垣呼寇諭以朝廷恩威責以
大義寇皆伏地請降且以復官爲言公諭令退舍俟
命寇遂麾衆而退公卽夕走使掣回各哨官軍厥明
合擊賊遂敗潰公仍議督僚長驅直捷而還獨渠魁
逃近未獲分別設方略卒擒而弭之人更稱功俘獲
賊屬萬餘簡審無辜悉爲開釋民深德焉家爲立祠
巡撫歐陽公重疏公籌策無遺功勞獨著保境庇民

繫人心於全省無降詔醜賈帝德之好生六月擢本
藩右布政使八月進左布政是皆以公資深序進而
論功之賞則猶未及也

雲南左布政使王公俊民墓志銘

王公諱俊民字用章號南湖其先石首人始祖勝友
生添禮添禮生聰四川廣安州州判始徙荊州府城
家焉聰生翔東阿驛驛丞配楊氏實生公初公就學
機神警朗書初讀輒能舉其要治易善屬文迥然出
諸生中正德丁卯中湖廣鄉試甲戌登進士第銓授
蒲州知州公下車課農桑緩刑罰修學宮甫三載而
士民德之州用大治當路者交章旌保擢大名府同
知當行民遮道畱不獲爭脫其轍以去并肖像事之
大名境廣政劇公才敏而勤時任都憲原孝爲守後

至郡卽自慶得賢貳身倚重焉凡重務鉅獄必以托
公公一一裁決有巨璫家故居城中怙勢侵古人地
宅公一切奪還之又勾考戎籍無隱弊郡人稱平撫
按表其治行于朝居無幾陞福建僉事兵備汀漳汀
漳道連三省多盜且每訟必牽引數十人經年不結
公至卽理滯平寃庭無畱案時閩中叛卒糾平民爲
漳南巨患公設策分布民兵往捕并其黨僉之地方
獲安秩滿擢廣東左叅議時田州土官岑猛煽亂
朝廷命出師公冒險觸瘴督糧餉以給軍士賊平撫
按上其功賜綵幣楮額者再時以入賀 萬壽至京

轉山西副使後改福建巡海副使過家方就道楊大
人棄養爲斂葬備禮服闋補河南副使兵備大名大
名舊治士民聞其再至驩甚比至諏訪民瘼飭嚴兵
伍如在漳南時未幾轉廣西右叅政尋陞廣東按察
使乃慎刑汰弊姦罔所宿名赫赫起轉本省右布政
益展心力得承宣體會鄉試諸生提調科場井井有
條甲午冬入覲京師先是部使者欲誣人人罪公與
論齟齬部使者銜之竟爲陰中乃調公雲南公至清
案牘勤聽斷羣吏斂手會有詔徵滇產黃金丹青甚
亟公移文督派恐民受擾每就中必爲寬假雖見忤

使者不顧安南搆亂時議欲討平之乃區畫兵食日懷隱憂會有驅兵民轉餉者地方洶洶自危一日聞士輟門軍衆鼓譟露刃欲爲變羣相視錯愕莫知所爲公徐呼使前諭以利害皆感泣聽命毋敢譁者而亂隨以定時方賴其有爲忽遘疾弗起時嘉靖戊戌四月十有三日也公平生恥奔逐初第坐其姊爲宗人妻得外補其實姊氏逝久且乏嗣制得無碍公一無所陳請或問之公曰某若是是干進也竟不聽後雲南巡撫官疏其事爲請奏可覆勘且至當道擬將柄用而公逝矣亮直練習文法蒞政詳謹雖事端

莽錯從容應之皆中肯綮事集又不矜功伐處僚友
恭異所在交承稱不絕口及聞公計慨歎至有泣下
者雖久官家無他贏論者謂爲廉介君子云

雲南左布政使黃公昭道傳

胡直

黃昭道字文顯平江人生有異質出就外傳凝重不與羣兒伍人奇之登弘治己未進士筮仕山東長山令其民悍梗素號難治昭道下車盡心按戢勸剔其蠹弊拊摩其凋瘵政令一新豪猾斂避歲大蝗愈捕愈熾昭道憂之默禱於神曰欲下蝗必得雹去蝗必得雨俄而雨雹交作蝗亦隨滅人以爲異宋范文正公幼讀書長白山昭道爲建祠祀之終三載銓司以昭道賢能徵爲南京陝西道監察御史時逆璫瑾等擅權號稱八黨昭道上章論劾引趙高仇士良爲戒

瑾怒劾下南京守備官杖三十除名久而積血千踵
遂成跛躄庚午瑾伏誅癸酉擢廣西按察司僉事尋
丁外艱乙亥起復以舊職補江西時宸濠久蓄逆謀
招納亡命劫掠彭湖等處爲地方患昭道捕獲數百
人訊讞成獄雖取怒宸濠禍出不測弗計也無何丁
內艱戊寅起復補山東踰年奉勅轉海道兵備副使
海寇不時囂聚昭道分遣哨兵設策勦捕濱海晏然
屢蒙欽賞屬郡多冤獄歲久未決昭道悉平之全活
首衆壬午擢雲南左叅政時木邦孟密緬甸讐殺已
數十年矣先是府官往輒以人馬萬餘擁前後軍

驚疑竟莫能撫僉謂昭道曰夷狄相攻乃中國之利
今撫之既弗服殺之乃弗勝計將安出昭道歎曰木
邦諸夷皆國家臣子性雖獷戾豈無人心哉若以誠
心公道處之則無不服矣何以殺爲言者慚竦頃緬
甸告急昭道主議但以數騎往渠遣人簞壺以迎入
其地諭以利害待以誠信前後事情悉爲處斷皆警
服權聲遠聞且貢方物如往歲事竣分管安晉道方
月餘尋甸報刷賊安銓欲殺守奪印甚急昭道卽連
整兵兼程而進賊聞昭道至卽釋守還印遁去好赴
本司右布政使尋轉本司左布政使時昭道久勞

務先年足疾至是復作遂告病歸辛丑三月偶病索
紙筆書曰老夫塵世七十四年茲以疾於三月初吉
大歸中書諸官履歷及家計爲詳遂成小子年壽清
勁無異平時衣冠儼然而逝見者咸以爲仙

雲南布政使陳公善神道碑

許孚遠

先生諱善字思敬別號敬亭世居錢塘太平里家乘始清河居士某凡四傳而至司訓公荆獻是爲先生考以先生兄弟貴贈禮部員外郎加贈刑部郎中母王氏贈安人加贈宜人先生生而端凝弱不好弄年十一能屬文嘗從贈公讀書於觀察王公署中一見目爲遠器十四及王文成先生之門十七試有司督學汪公置異等甫弱冠當督學林公選爲五經師所造士若太保高文端公而下多賢達甲午舉浙江鄉試第二人辛丑成進士拜欽令初至屏供帳一切汰

省示民惻惻故健訟先生以至誠化導訟日簡無
何丁王宜人憂服闋補桐城時贈公司訓崑山先生
用出都門覺心動馳抵崑贈公果疾革居三日而永
訣僉謂其孝感云已酉北上應聘分校順天士兼易
詩得榜首孫公鋌二十四人已補清苑清衝劇而疲
尤加意損節先是金臺驛站馬出闔郡諸州邑厥後
變爲輸銀貽害清甚先生議仍前規均派爭者蜩起
會內轉力請于當塗行之而清人始蘇在禮曹典屬
國往朝鮮諸夷以貿易輦漢物歸縣官費供輸而牙
僧售苦窳爲夷人病朶顏貢夷且有僞增名物窺利

者先生悉糾禁之言於宗伯華亭徐公著爲例進主
客員外郎尋轉僉憲督學廣西首進士以正學使知
根本重德行倣何仲默關中學政令誦習經書傳記
于史古文詞學士彬彬嚮風焉未幾轉叅議駐惠潮
海寇初平瘡痍未復一務休養安集境內宴如旋轉
副憲督滇南學其型範規條無改而學之舊載刻小
學句讀自警編忠孝歌頒教諸生遷滇右叅政督理
銀場諸言開礦利者俱報罷始先生督學時以執法
忤鎮臣且忤御史至是被誣論褫秩去已而承陝王
侍御諍按滇廉其枉力辯于朝其略謂陳善居鄉居

官人稱爲古君子及任前職人稱爲真提學諸所舉
措實能造就人才低以慙直忤權豪而受譴廢臣入
滇聞諸鄉縉紳諸生父老言最稱冤枉亟當召用朝
論建之復原官隆慶改元起山西按察副使尋轉江
西左叅政未匝月轉廣東按察使先生以刑獄關係
民命精審讞牒洗冤剖疑纍纍多異政具粵臺行稿
中會流賊曾一本寇廣城城門盡閉軍民扶老攜幼
向城而泣先生惻然曰奈何棄數萬衆于鋒刃下爲
啓門躬爲殿而入之賊矢幾反車蓋竟無虞轉雲南
右布政使自貴入滇道崎嶇甚先生捐俸爲倡開險

爲夷者數十處滇人聞光生至苦甚先生亦樂撫之
與利剔蠹不遺餘力黑白鹽井久爲墨吏家家所乾
沒於是釐刷一清而民稱便海歲採上供金二千兩
而滇實少產金戶業困且復增輸三千先生建議派
價諸州邑市金蜀之寧番慈寧以解民得無擾六衛
諸倉散餼爲奸利先生詳定條例刻石永絕弊源撫
臺某欲奏行戰象之法於朝先生力言西北非用象
戰地象產在炎徼不耐邊苦寒每市一象於土夷度費
金五百而水陸萬里煩擾百端貽患匪細議得寢故
事土官襲蔭黠胥多方難之索其重貽先生卽與轉

聞晉無停晷嘗曰泊滇以馭夷爲要沅江武定之事
失其心也人以爲名言會武定之役兼攝洱海道事
武定經鳳氏變後議更城獅山而激江城又議遷廣
西嵩明兩城且新築四役竝起物力不支先生多方
調度不踰時而工就復立哨建堡以峻金沙七度之
防推誠布信民夷大悅昆明之旁山曰橫山山陽有
田五千餘頃地高苦旱先生視白石崖有泉在上遊
可引溉而爲橫山所隔議欲鑿山通渠兩臺離之先
生日事在我耳卽矢衆禱天焦勞經畫山前後竝興
開鑿之役功久未成庚午大比提調雲南文武鄉試

事辛未轉本省左布政使先生居滇三載久蓄去志
而以方有事橫山淹留歲月至是決意引去遂上疏
乞骸骨新鄭當國許之錫日啓行則橫山水洞忽報
開通蓋神明實有相于先生也傷山數萬家受其利
因名其洞曰惠濟立祠洞旁肖公像祀之去滇之日
行李蕭然緝紳爭爲詩以頌家宰嚴公清有眼前鐵
漢撐天地暗裏丹心泣鬼神之句先生既歸造請盡
絕自御簡素纖絳至修築堤塘道路勞費不恤其束
新塘九十餘里倡於先生而成於郡伯劉公伯綰張
公振之利濟甚鉅若觀音塘黃泥愁雲二嶺皆有修

桑功生平存心濟物然有差等不妄施三黨之親而
貧疎而賢者洎故舊門生之賢而貧者時有周給其
婚不能嫁死不能葬者並給之屬歲荒傾貲市米爲
賑復作糜以哺餓者民病疫施方藥給楫具冬月施
絮衣掩骼埋胔不可數計戊子春形神已憊猶力疾
焚香籲天爲民請命家人進梁肉輒推不食曰民糠
粃不給吾忍甘肥脆耶遇窮交淪落或故人子有急
每極力拯援桑梓利弊知無不言賴以調停者甚衆
然不令人知也先生蚤聞王文成之學遇按察憲蕭公
原督學滕公伯輪大集學徒于天興書院爲先生提

衡其中書院中廢又旋復因修復俎豆祠田爲長久
計撫臺徐公祇聘修杭郡志先生做綱目立例自漢
周迄今具爲條載筆削甚嚴凡再開版而志成然精
力自是耗矣先生林居里二十年臺省薦無虛歲太
宰張公瀚嘗以先生及雲間莫公如忠吳門袁公洪
愈三賢比諸商彝周鼎江陵目爲迂濶不用晚人張
太宰諸耆英怡老會李公貞亭少師事先生及歸休
采杖屨相屬鄉邦尤稱美焉先生信古好禮冠婚喪
祭母苟徇流俗忌辰縗衣蔬食哀慕終身閤門肅穆
勿無廢侍與其配命夫人相敬如賓命所屬然獨意

恒竟日端坐諸子進見拱立於旁有問則對無敢輕
發一語者器具朴陋不愛華飾見人服食靡麗輒目
漸之至有鼠服以見者每晨興整冠服坐庭中令子
婦請孫次第相見時有訓戒語家僮無小大蚤暮出
入儲察必嚴不令共一時放蕩於外也已丑冬一疥
甚然無他疾曉起猶巾櫛如常勉諸子孫以立志遠
大親正人等語夜呼季公來訣奄忽長逝可謂正命
考終矣享年七十有六所著有學堂行稿二卷黔南
類編八卷黑白鹽井事宜六衛倉條革二卷杭州府
志一百卷動賢祠志四卷族譜二編家藏稿五十卷

雲南叅政楊公鐸傳

子廷附

祥符文獻志

公諱鐸字文振陝之朝邑人元季兵亂其四世祖德亨東遷河南之原武祖旺隱德弗輝至父智以公貴封僉事生六子公其長也幼入邑庠明春秋宣德壬子中河南鄉試魁次年會試秋曹第進士觀政刑部正統元年奉勅前往陝西募修宣宗皇帝實錄次年三月除授大理寺左評事詳獻平恕公勅之舉茂著當時正統乙丑陞授陝西按察司僉事廉能以持已嚴明以臨政時遇按察使總治司收多尚寬平奸宄之徒肆爲佞辭皆得疎放公知爲奸佞所欺必

法言以正之由是輿論稱快聲價益著景泰甲戌復陞陝西布政司右叅政督延綏甘肅等處軍儲益勩乃心益公乃政邊事益寧軍民悅服天順壬午丁內艱服闋復除貴州叅政通前九年滿考夷獠不捨其去合疏保留陞食從二品俸照舊官事成化丁亥丁外艱還鄉朋友人宋克新謫官東阿與妻子俱喪不能歸葬公乃出備路貲遣人自東阿取三喪歸葬之鄉人稱羨公之存心多類此服闋復除雲南左叅政蒞任未幾引年乞致仕還僑寓汭城日與士大夫優游詩酒鄉社之間歌詠吟嘯微醺輒自舒懷嘯詠而

不拘拘也公初配梁氏贈宜人繼配趙氏俱先卒繼配孫氏亦封宜人子六曰璣鄉貢進士曰球弘治庚戌進士觀政兵部

子璣字廷佩別號靜軒其先陝西朝邑望仙里人高祖德亨博學好古元末避亂攜家東徙開封遂占籍原武祖智封按察司僉事父鐸舉進士歷官雲南叅政致仕歸以河患復遷居大梁公甫弱冠提學陳公選見而異之曰吾禮經有傳非子不可遂受焉成化丁酉舉于鄉錄其經義一爲式屢試春官不第且親老家貧諸兄相繼沒公乃服田力穡以養其親暇日

從事問學至弘治庚戌登進士辛亥丁外艱服闋授
兵部武庫司主事改武選司辛酉陞車駕司員外郎
奉命同御史某汰京衛軍得避匿者萬人歸伍且上
章劾私役者 上嘉納之爰著爲例乙丑陞武選司
郎中奏行公蔭襲嚴比試諸條大司馬深器重之正
德丁卯銓部以廬州乏守擢公爲知府公至則壹以
廉正御之郡有疑獄歲久不決公親排勘得生者六
人郡大疫公請禱徧給醫藥活之宅若敦禮士夫教
課農桑得古循良之體庚午陞長蘆都轉運鹽使司
運使署設滄州近京師商旅多豪右然鹽場有遠通

美惡公場置一籌納竹筒中令各商以次出之豪右
不便公曰吾革弊耳權貴何卹焉由是鹽法大行士
申劇賊劉六等攻滄州急州吏失守公督州民諭以
大義登城守之且伺間發矢遂斃賊首乃解去當道
以聞 上賜旌獎是年冬滄州內寇殺吏民劫倉庫
公倉卒率市民力攻而逐之先是有馬指揮者與公
善出白金二錠寄焉後公抱病危然惟馬全因反
破篋中獨完左右欲私之公叱之曰是何言安作此
喪吾所守癸酉公年逾六十上章求退者三而銓部
方錄公賢勞進階以請得旨陞山東右叅政致仕公

優游林下十有三年丙戌歲卒壽七十五公性剛直
善談論古今非其道義不肯取與人歷官中外循循
簡朴澹無所好歸田閉門靜坐飲酒彈琴無所干於
人而人亦不敢干以私其若世之人逢達履窮蚤營
夜計以惟日不足自黃童至白叟形神勞役若將爲
得者豈不悲哉 副使田汝紆墓志

雲南左叅政黃公暉墓碑

黃 衷

朗溪之黃六大宗中派自汴梁宋靖康之季避亂南
海是爲朗溪之始公諱暉字時雍榛坡其別號也曾
大父宗善沈毅有略後山之亂以計干主將脫良民
於兵者數千人大父慶父超贈奉直大夫吏部驗封
員外郎妣鍾贈宜人公生爲棄弱不好弄嘗坐曹役
羣兒若官府者長老目之曰黃家偉器也甫及志業
嶄然出師右年二十六領成化乙酉鄉薦卒業太學
益博綜羣籍以書授徒凡得其旨要者卒爲名士然
屢屈於禮開始謁選天曹太宰置其文第一授吏部

司務陞司封員外郎時東廠權譏特盛曹署請謁必
踞歲暮饋曆公次當往比見長揖而已總兵沐崑請
嗣黔國公公按其世宜襲西平侯執奏至再朝廷以
舊恩遠鎮特與世公爵故事子通朝籍父爲外小吏
雖以罪廢尤冒貤封公奏革之由是士人始知恩典
之重尋拜江西左叅議奉制督儲入辭家宰屠公屠
曰江西大藩錢穀弊集是以付卿公對曰往服厥官
安敢不力如後有謂皞才智弗給卽皆可信若謂其
貪辛見察耳屠曰嘻豈有是哉至則摧豪惠良去業
蠹如振秋槁郡縣糧目素繁且祿若完若負不稍薄

領肆口指陳無一舛謬又妙通算法日量糴糴不假
籌計奸吏屏伏糧政大修寧庶人蓄異志禮多借炭
口僚朝見類贊叩頭公伏不動俟贊畢而興識者以
爲得體祿米折價溢數而橫取公執不可庶人大怒
遣儀賓李某動以危言曰殿下且熱熱下卽布政通
判輩斬矣公徐曰第斬吾一人足矣何究彼邪其議
竟沮至如辯豪僧之誣訟過兄運之侵暴上下趨焉
居八年撫臺林公見素薦之巡察若僭若周若王薦
之以無內援未果還值逆瑾亂政裁奉制官公在裁
列士民攀泣且欲疏乞留公輕舟徑去旣而江西糧

務日弊朝議以舊職起公復領其事未至擢雲南左
叅政所官納樓茶甸長官死妻沙福代與夫弟普顯
治兵相攻積數年死者甚眾撫鎮屢遣屬僚撫諭竟
莫能平公曰非藩臬重職恐未有濟乃偕僉司都閫
以往比至境福顯皆盛兵自備公若不聞也者捫館
卽召二渠反覆詰讓盡得其情乃執通把數輩將拉
之操兵者望風奔潰公度其已困釋之曰日暮且休
矣遲明俱來吾有戒約詰旦二渠皆束身伏庭下聽
命去居數月福等各行千金來謝初約且曰已告夫
二子者公曰吾卽受此緣此死者又不知幾千百人

吾雖貧以老如子孫何謀者乃寢竟弭其亂初安南
長官那代攻破蒙自虜其令祿卿之族負固重二紀
歷數守巡毋敢議者公至則濬堽增陴調餉練兵建
旗鼓申號令若將征之者代懼請歸祿卿之妻若其
屬口乞緩師以圖新由是威震六詔瑯崔安附瑾作
威且忌公功語次微有譏犯公盛氣力辯聲已俱厲
安乃媿屈連呼鐵漢吏民因稱鐵漢公云北政仕重
索而歸觀者泣歎謂三原公後無此廉節也公雅善
吟詠晚年屏居詩益雋永遺稿數千家正德壬申孟
冬四日卒享年七十有三

叅政朱凌溪先生應登墓志銘 李夢陽

凌溪先生朱氏名應登字升之揚之寶應人也生而
舉奇童時卽解聲律諧詞章十五盡通經史百家言
其父江陵公者異之然懼其踰也約之古凌谿悟乃
著申臆賦以見志而力殫于淵學於是飫醇探赜程
猷經用噴英摘華樹聲藝林矣年二十舉進士時顧
華玉璘劉元瑞麟徐昌穀慎卿號江東三才凌谿乃
與並奮競騁吳楚之間欲爲俊國一時焉古之士爭
慕嚮臻樂與之交而執政者顧不之喜惡抑之北人
僕恥乏黼黻以經學自文曰後生不務實卽詩到李

杜亦酒徒耳而柄文者承弊襲常方工雕浮華麗之詞取媚時眼見凌谿等古文詞愈惡抑之曰是賣平天冠者於是凡號稱文學士率不獲列于清銜乃凌谿則拜南京戶部主事陰欲困之凌谿劾其斷錯乃頗亨于官而其學愈淵居無何陞延平知府意州郡吏必難乃凌谿爲之愈益亨乃於是陞陝西按察副使使提學凌谿闢正學院羣泰士高等其中置官設徒豐儉嚴約談經講道至者且數千指風教大行文自韓歐來學者無所師承迷昧顯則我明旣興隆本雖切然要與未聞也及凌谿等出創觀駭大不

容於人人各以所不勝相壓而凌谿性挺直不鮮假
詞色於人更多僧口恨不卽寤之幸例調筑裔往禦
魑魅尋陞叅政卒罷去凌谿歸潛伏草莽中溫釋前
業期十年盡償所願而今亾矣噫嗟嗟悲乎人忌之
天亦忌之邪夫蛾眉胎禍才美殃毀順往逆來孰非
爾者然英人志士每甘心窮約而不悔者徒以人者
難必而天者足恃也十年之內徐何載淪凌谿何歿
天實忌之矣人何尤哉噫嗟嗟悲乎凌谿生成
化十三年正月己未得年五十國旨曰先帝後貧病
從內生言淺狹之易折也凌谿邱落易直僧口日哆

而聽之如蒼蠅過耳斯其量可與億億化化者道哉
退研精肫推訂律歷運數讐史質經底詮名實流覽
古今橫睨宇宙視軒駟直躬徇耳大命中奪齋志長
畢非天忌之而誰忌邪卒之日適邑官來謁揖讓而
氣絕斯病內生之否邪噫嗟嗟悲乎悲乎凌谿他所
奇節隱行與凡履歷宦業忠孝友義言動細小莫之
具述第述其生死大槩爾運數者如此

雲南布政使司左叅政陳君覲墓志銘

張時徹

君姓陳氏名覲字忠甫其先南朝之裔世居餘姚開
原鄉宋有諱昇者嘗率鄉兵禦睦寇授武功大夫京
畿都統領子廷俊復率鄉兵禦金人境內賴焉高祖
諱孟雍贈吏部文選司郎中曾祖諱雷封河南彰德
府同知贈湖廣布政使司左叅政祖諱廷敬直隸薊
州判官贈工部營繕司主事加贈廣西布政使司左
叅議湖廣布政使司左叅政父諱煥光祿寺卿母胡
氏封淑人君爲光祿公第四子正德癸酉光祿公舉

於鄉捷書至而君生自幼秀穎不羣束髮從其族兄
湖廣右叅政塏授大小戴氏禮輒能了其義爲文溫
夷爾推年十六補縣官弟子已復爲國子生辛丑仲
氏太守堦叔氏少宗伯陞同舉於春官君益自奮厲
折節讀古人書顧連蹇不得志於有司庚戌居光祿
公憂戊午捷順天鄉試己未再捷春官拜兵部武選
司主事尋陞車駕司員外郎再陞郎中佐大司馬權
機肅清軍府人無敢干以私者甲子轉武選司郎中
凡天下武臣承襲者咸隸焉史每竊柄舞文紈袴子
皆入賄賞緣爲姦選舉往往多濫君一以至公振刷

之邪蠹屏息三月居母淑人憂丙寅服闋復補武選
司郎中風裁益厲兩典武會舉一考天下都司官豪
雄帥領多所識拔累官郎署練達機宜材識卓詣大
司馬虞坡楊公大器異之戊辰兵備湖廣衡永柳桂
諸郡益朝廷以君夙望故以全楚要害付君君馬首
南也輒銳志經略會新寧瑤人寇掠江廣詔下命君
討之君以兵餉方不足而與蠻夷從事邊鄙重傷元
元之命乃遣使者招撫諭以威信瑤人面縛降轅門
願受朝廷約束誓無敢復反者廣東賊黃潮祖等流
劫郴州桂陽君督兵擊之斬獲虜首以百計招降餘

黨悉平廣西賊韋銀豹韋大駕樓船沂衡承江大撫
諸郡君又督兵殲之江上時兩廣征古田徭僮軍則
檄君爲備乃君大振兵以張軍威聲聞八桂蒼梧閩
虜爲褫魄彼省克奏首功徭人既平則給土田立堡
嚴修城垣募勇敢足軍糧興學校明教化凡士風吏
治民務戎機靡弗經營益爲朝廷保障一方樹長久
之畫非苟偷旦夕安也而君之神用亦竭矣初陳公
士賢有惠政於衡永間衡水人立祠祀之至是以君
先帝萬壽節報政於朝先已陞君雲南左叅政而
克以勤勞是事績著疾作卒於京師旅舍時壬申三
月初九日也虞坡楊公撫而哭之出涕曰使君須臾
無死即卿承何足道哉乃給諫趙官居其喪歸故鄉

叅知李公渭傳

澹園朱

歲癸亥余師天臺耿先生董南畿學同野李公從之
遊余乃獲交公及公數歷中外相去萬里不忘以學
相商證而今已矣是不可使無傳乃爲作傳公諱渭
字湜之學者稱同野先生上世自吉水遷思南父諱
富累贈中憲大夫母張累贈恭人公生而朗然玉立
眉目如刻畫十三補郡學弟子員十五病居小樓當
盛夏箕踞而處中憲公以無不敬飭之公屏然書諸
牖尋曰如妄念何中憲公又以思無邪飭之復書諸
牖久之靜默中恍若有得者及與客入談前境隨失

因自疑曰有得有失非本心也自是公之求心者日切嘗謂伊尹堯舜君民自一介不取始故引冠蓋賢書於交際甚嚴舉似道林蔣公蔣曰靜假動真問一介不取蔣曰嘖嘖然小人哉公聞之愧甚不覺汗之浹於背矣入曹都耿先生以宦業相知已進而語學有深省遂就弟子列及耿先生里居公往謁夜與先生弟子庸共論亟稱明道識仁語子庸不答也俄疾呼同野在否公應曰在子庸曰同野在乃從明道識仁公爲之灑然最後與近溪羅公爲寮互相叅證其學益邃嘗曰孔子毋意孟子不學不慮程子不看纖

毫人力皆非從安排得來知毋意卽千思萬慮皆
意也知無纖毫人力卽已百已千實無纖毫人力也
學是學此不學慮是慮此不慮而已又語門人曰浮
雲人間作雨天上常清常明狂風江中作浪流水不
增不減知得常清常明不增不減者可與言學矣一
日讀學道愛人語謂人曰道不明則仁體裂天地閉
惟是念念在民令同歸焉然一體中吾之願也故迴
翔郡邑二十載所至精心爲縣官牧小民大指率歸
於此初令華陽爲鋤奸弊拊流移不得甘食息知和
州興學校抑吏胥歲省浮費數千金部縣肅獄待公

而決遷高州府同知至則謁甘泉湛先生修復書院
教授諸生疊疊不倦而以其間飭武事爲不虞備西
賊來攻公率所部授甲置陣爲三覆以待賊竟引去
時方變里甲爲均輸公劑其多寡官爲主游放民歸
農至今著爲槩令嘗夜夢巨蛇布身者三揮杖擊之
詰朝合浦吏以美珠進化州吳川吏各以兼金進公
斥去不顧笑曰金珠非寶固吾人蛇蝎哉晉應天府
治中南戶部貢外郎再轉工部郎中出知韶州府先
是韶有二源之役百姓苦之甚多去爲盜公集寮屬
諭曰夫子告康子以不欲弭盜之本也倘身爲州宰

是我爲盜竿而何以責之民乎弭山中盜易弭心中盜難諸君勉之聞者悚息居韶治最富逸而韶民以借寇請詔進服俸知郡事如故再入覲時 穆廟宴天下守令卓異者七人旌之幣鈔公與焉還詔尋其省副使平惠潮討朱良寶克威厥功恩賚加等經略惠潮水寨更置守巡建清遠邑治開驛從峽中東山達英德以通東粵皆公本謀也晉雲南左參政洛松溪水灌田萬餘頃城首寧安寧二州以具金碧時通用兵久疫癘大作司局業與糜食貧民所活無算死無柩者官給之至八百有奇往上官製替當事者目狀後錄

爲奇貨畱數歲不遣公建議輸粟藩省代 奏按官
部使者上其議土司萬口頌之矣在滇四載謝事歸
隨中國書數卷無長物也四方負笈從遊者衆搆朋
來棲居之日惟明道作人爲務居恒事父中憲公蒸
蒸敦謹卒柴毀支骨毋張恭人病暴已罪狀籲於天
乞減算以代建宗祠聯族屬念俗日敝力持古禮以
先之常言居官不廉從糜費始於儉德三致意焉時
多有興起者戊子疾作猶日與門人論學至革進諸
弟子訣惟以學爲規言不反私旣卒士民奔哭者累
月四方同志或爲位或爲文哭之不可勝紀公自言

於學入白下見耿師與居和高時不同過楚登天臺
又覺與白下不同與近溪游月巖復覺有不同者如
登九級浮屠隨步而異所謂未見其止者非欺所著
先行錄答問三卷毋意篇合大學中庸易問爲一卷
簡寄二卷雜著一卷詩一卷文二卷統十卷又著家
乘十二卷藏於家大儒治規三卷行於世先後按部
使者採鄉評祀省會及郡學鄉賢祠又從諸生請郡
建特祠祀之生正德癸酉十二月卒萬曆戊子四月
享年七十有六諸子姓彬彬爲文而廷謙世其學尤
著載耿少司馬志中不具論

論曰夫範金爲鼎貴重矣一旦入用以烹飪炮炙曾
不若釜鬲之爲便何者其文勝也而適用非也晚宋
儒者握拂矩步自以無前而不能當於用往往爲姍
笑者之口實參知公在所有循良聲益學以本政政
以徵學卽謂淵騫冉季兼數器而有之奚不可者善
乎參知之推言之也曰吾之知學自耿先生始詩曰
豈弟君子遐不作人耿先生之謂也

朝請大夫雲南布政使司右叅議趙君忠基志

銘

馬中錫

君諱忠姓趙氏行恕其字也其先宋宗室福王與芮
六代孫繇汴遷越再徙蘇遂爲蘇之長洲人高祖諱
孟桂元中奉大夫檢校大司農平原郡公曾祖諱由
瑤濰州知州祖諱宜濟隱德弗仕父諱學禮樂善好
施鄉稱長者以子貴贈文林郎河南道監察御史母
陳氏封太孺人行恕自幼秀穎端重異於常見稍長
氣听魁梧楚楚如老成人父道入邑庠爲弟子員
同學講習窮晝夜不少間學成遂以宣德己酉領京

聞鄉薦庚戌登進士第觀政內臺踰年擢河南道監察御史文林郎明法律達憲體慨然有澄清天下之志而哀矜愼恤恒存於心時鄉先輩陳僖敏公掌臺事振厲風紀御史中非卓卓者雖鄉舊不少假辭色而獨禮重行恕正統己未奉 命按四川所至鋤強激貪問民疾苦而興革之境內清肅未幾有司報松寨商巴棘麻國皆叛君卽奮勇率兵入其巢震以風威諭以禍福其黨衆悉潰旣而廉得其實乃統兵者激變所致遂劾其罪罪之朝廷遣使賜寶鈔酒幣將吏懾服番民向化邊境以寧辛酉奉勅巡浙江海道

早夜盡心撫士卒飭兵備繕城堡嚴斥候卒無意外
之虞壬戌歲朝廷簡能御史清理天下軍政廷臣僉
議舉行恕乃拜璽書之廣東督勵所司期以實效雖
蠻鄉瘴海無不躬履其地不踰年軍士肅清民不告
擾一時爲御史者皆自以爲莫及未幾朝廷以陝右
鉅藩嚴方岳之選遂擢行恕右叅議行恕居官勤吏
治恤民隱陝之人無老稚賢不肖皆愛戴敬服尋以
舊官復任改雲南左叅政因構疾還鄉調治遂不起
距其生永樂甲申享年五十有六行恕平生操履端
謹財出非義者一介不苟取故久歷仕途囊無餘貲

遷鄉鄉之居室族子弟以窶而售之人矣行恕携家
累孑孑然無所於歸其友朱名仲憫焉乃假餘屋以
居之既卒其喪不能舉名仲復偕其友徐文輝輩倡
助以襄厥事爲文章典重和厚詞理精到詩好唐人
旃風辰月夕撫景感懷必見諸賦詠長篇短章清新
典雅足追古作云

雲南按察使劉公鈺墓表

何喬新

成化十有四年春雲南按察使劉公仗和帥其屬入覲懇求謝事吏部以聞憲宗皇帝特允其請公歸徜徉林泉者七年以疾卒于家享年六十有四諱鈺仗和其字也其先木長沙定王之裔王之于蒼別封安成侯安成卽今吉之安福也至其孫奇尤以罪國除因家于邑之茨溪昨胤蕃衍歷唐宋以至元代有顯者曾祖諱子定別號新齊始徙家邑之葛溪祖諱伯文別號文閣贈禮部儀制司主事考諱球由進士累官翰林院侍講上疏指權奸歿于制獄贈翰林院

學上謚忠愍母邵氏累贈太宜人公自幼穎敏過人
忠愍躬教之時姚文敏公學于忠愍公之門公與之
上下議論文敏每歎服之稍長從學于禮部侍郎李
公克述學益大進會忠愍以諫受禍公哀痛毀瘠幾
不能生服闋讀書養母無復仕進意 景皇帝卽位

臺諫言忠愍之冤詔贈官賜謚且祀于郡之忠節祠
刑部侍郎楊公彥謚巡撫江西名公語之曰而翁忠
節已獲昭雪于可以仕矣公乃赴江右省試以春秋
魁多士甲戌登進士第改翰林庶吉士預修寰宇通
志書成賜楮幣文綺擢廣東道監察御史未幾出巡

福建畿郡遼東于時同官者務挈搏以時聲威公獨
慎憲度理冤獄察吏治巡歷所至訪民利病而興除
之不求赫赫名人皆以爲得憲體真定有安婦不安
其室其族長恥之令羣從毆殺之有司坐以謀殺當
死者七八公曰此羞惡之心也何可深罪具以上請
遂皆免死福建都指揮僉事錢格與其長劉姓者有
隙劉密白鎮守中官誣以罪乘夜以兵閉其第格覺
而逃中官遽以格反聞廷議遣官督公殺其事格亦
詣公自首公具奏格懼罪而逃非反也格得釋每語
人曰微劉御史吾族幾矣汀州采民欲奪隣之墳地

以葬其親鄭不與豪怒言于朝云其地當出帝王
英宗遣中貴人會公驗之公曰八閩遐且僻寧有帝
王地邪真妄言者于法既還臺同官以私忿欲劾大
臣且誣以閨門之私以章示公公曰言事當顧大體
奈何以曖昧之事汙職大臣其人慚而削之天順甲
申陞浙江按察司副使奉璽書提督學校公至則明
教條嚴考較進茂良黜惰賦繇是兩浙文風丕振擢
倫魁登應仕者彬彬焉成化辛卯遷按察使或疑公
優於文學法律非所長及見公決獄曲當其情乃大
服尋丁太宜人憂去服闋改雲南按察使雲南荒服

之地外與哀牢交趾接公因俗爲治寬其禁令馴以
恩信蠻獍畏而懷之及公歸羣夷皆大息曰是善撫
我者何遽去耶公性孝友忠愍公歿事太宜人以孝
稱與兄叅政仗德友愛尤篤接人一以誠意而世所
謂機變之巧若無聞者居官盡職分未嘗銜能矜名
以求人知而當道亦無能知之者故其官止于此

雲南按察使張公翥墓志銘

王 鏊

雲南按察司按察使張公諱翥字汝振世爲蘇之長
洲人曾祖諱進浙江諸暨知縣祖諱滄國初以人才
徵未用卒考諱樞贈奉政大夫南京刑部郎中世陸
氏封太宜人公登天順丁丑進士授工部都水司主
事改虞衡司又改南京刑部山東司歷員外郎郎中
出知江西南昌府進河南布政司右叅政雲南按察
使致仕以子約貴進階正議大夫勲資治尹 今上
登極以詔恩進中奉大夫正德丙寅冬十月二十九
日卒於家春秋七十有七配吳氏累封淑人子男二

長約工部營繕司郎中公清慎守法矐然若不自持
而見義卓然不惑始至南昌卽理冤獄出之民大悅
尚安有毛姓世豪於鄉縱火殺人亡命吏不敢問公
發之竟置重典民又大悚有中貴乘傳搜括民間奇
玩勢張甚郡縣望風迎拜且以鹽抑配於民而以庫
銀給之至南昌公曰民吾民也庫朝廷之庫也誰敢
干之吾將以聞於上中貴見公不可奪乃稍自戢
時所至民被其擾獨南昌晏然雲南諸夷爭襲賄賂
公行公一切禁絕年南

六十以居老慈乞致仕以歸
公天性簡儉家故富土貴大
而自奉有人所不能堪歸吳掃地開門客至明清話
終日澹如也居官所至能舉其職而南昌之政尤偉

雲南提刑按察司按察使張公憲臣墓志銘

王世貞

故雲南按察使張公以萬曆元年五月卒公諱憲臣
字欽伯其先晉陵人有贅於崑山者遂家焉世力
田孝弟至公父府君洪有隱德嘗之嘉定得遺金數
餅爲迂歸以俟以金者授之金卽馳去一日輟耕隴
上有相者過而指府君曰是大常顯顯乃以子故府
君笑曰吾家世農安所取顯耶公時爲兄從徭聞之
竊沾沾喜就里塾師吾伊不絕矣公業成爲諸生久
次其成薦復偃蹇南宮試者久之而能不以戚欣見

貌益砥節於學由進士謁選得南昌令人或虞公寬
大不任劇曰令可拜跽稿也且倖相地何以處之時
南昌饒積牘數倍他縣而黠吏欲以事嘗公則爭
採牘緩急雜而進之公第行其急者而抵緩者地曰
胡足溷乃公也後不以序進立扶汝矣吏咸吐舌稱
伏神明邑事大治近地時中大盜公出循行鄉落見
長老間所苦人人自喜謂張公全活我又清狂狂之
宿稱寃者十餘卽摯擊無以難也公胡髯腹便便造
請臺省諸公間亦不廢諸公日益賢重公曰得數張
令五言曾不安枕耶而有段御史某者勢張甚一日顧

公語縣羨金若干吾欲有所餽謂倖相也公徐曰縣
無羨也御史怒謂南昌令不奉檄覽訊謀而稱無羨
公前謝曰此乃三殿工羨也縣不敢置他羨御史益
怒詆詈不絕公起自如御史以巡按滿寅緣監軍事
再上疏有所推薦不及公而公益以治理流聞卽倖
相亦語人張令似不識吾家家亦不識張令無何倖
相與御史後先敗而公用卓異召拜工科給事中卽
上疏四事平賦役修水利重守巡謹隄防公故家東
南於東南計尤切時方修廢備公謂卽武庫甲仗將
士司命奈何一切屬中官宜付外給事御史得覈之

又謂兩畿試不宜諉司訓老生能失士咸報可公自
吏科右給事遷刑科左持節封唐山王克正使給事
中之得正爲使自公始也還晉戶科都給事中三上
疏論國漕大計下所司行之公自起小官驟貴重然
恂其益務爲恭謹不以白簡故加朝紳色而其於國
家計尤悉眷有指樹數馬風諸公卿翕然稱之至出
爲浙江右叅政相驚謂曰張公長者胡遽離瑣闥也
公於職分守金匱嚴三郡官平礦寇大將軍用師閩
多倚義烏人而義烏人益驕橫竊相從剽攻椎埋不
休公錄其豪以自隨而餽之躬爲訓練成師曰子去

盜而爲縣官用抑何貴也建德學宮煥公捐奉以先
之益學成而諸生有膺薦者矣公爲叅政三歲始遷
雲南按察使墜入境黔國公橫而欲用故事責三司
苛禮公使人語之曰公安得稱故事夫豈昔日黔公
也望金馬門若九天上而欲輕加其從臣乎尋謂其
僚曰禮如是足矣尋甸土酋沒而其妻安攝政移欲
得四川酋某夫之公獨曰安攝而私其上之人固恒
今不虞失土耶毋亦奸人詐爲謀以構難乎勿許便
俄詐露竟知非安意也公在諫垣日以推轂賢士大
夫爲主然不欲使知之而其所繩紕絕少恒曰吾奈

何以耳語輕折天下材願獨効一都御史苛暴好殺
會有與主得不罷而都御史驟遷至八座與相而握
銓者比遂因上計誣斥公歸公聞命之後日即行滇
以饒貨甲天下公無所攜顧獨拔士之宦滇而不能
歸者悉傳置之人謂公即廉奈何借他人裝而重我
行李也公笑不答當是時田畯市叟咸喜得一當公
爲壽至詞翰之社雀躍思御而竟病痹矣痹一歲省
可能起行忽宿痼痼潰不止久之卒年六十有二耳公
爲人寬仁恭儉出天性即所造請毋論其可者其不
可者亦訥然不欲見口也所推遜以論豪長輩即兄

惟惟恐其失之也五六歲喜爲詩至老而吟詠不倦
雍容和平得大曆貞元遺旨然不欲爲人出之間有
能舉公詩者輒面赤囁嚅欲避去以故其詩存者千
餘首奏議公移雜文若干卷鋪之筭而行者僅紀游
二稿而已王元美曰張公之爲長者乃爾吾聞之
明興崑有王君良事 高帝爲陝西按察使 高皇
帝揭其名於殿楣而目之敦厚其所爲長者狀非一
今乃併張公二矣其官同其祿壽不配德又同世無
有能名王君者如張公可以與矣

雲南按察司副使徐公觀傳

徐觀字大賓其先世有自滁州來爲姑孰守者因家焉遂爲當塗人祖義由明經舉任巡檢觀年踰志學從師受易克自刮磨以底學成領鄉薦年方十九乙未會試中副榜授山東齊河縣學訓導以內艱去任服闋調江西武寧縣學訓導人才多所造就秩滿使翰林院校其績學皆優超陞刑科給事中駁覆奏章糾劾姦惡無所顧避嘗奉命檢封番舶巡視邊陲所在有聲正統初刑部尚書魏源薦觀擢雲南按察司僉事至則辯冤獄別廉貪一以平恕施之上下悅服

稱有古憲臣風時麓川小夷負固拒命詔興師討之
觀佐元戎深入賊境督糧餉規籌策賊寇以平陞本
司副使餘孽煽惑乃於要害處築城堡濬溝池以備
不虞且爲墾荒田俾軍耕守復招還夷落破賊虜掠
者數百人爲嚮道又畫通南牙山道路以進討由是
邊患永息會按察使缺守臣率衆相與奏觀補之而
觀進表卒于金陵之新河享年五十有六

雲南按察司副使陳公政傳

黃佐

陳政字宣之番禺人生而秀穎六月能言三四齡時客有以三人聚話命之對者應聲曰四皓同遊客大奇之十五能文詞有理政作自訟文以警勵提學僉事彭琉見之曰此殆潛心孔孟者也亟稱之正統辛酉發解第一卒業太學祭酒李時勉命與商輅等四十八人讀書于尊經閣下登景泰甲戌進士選爲翰林庶吉士與修寰宇通志書成拜湖廣道監察御史繩愆糾謬務存大體嘗疏敬天勅民十事人服其敢言尋奉璽書提督北直隸學校立教條十五事設簿

書以稽學者勤惰隨其資質高下而成就之大都以
德行爲本文藝爲末未嘗輕易棄人故學者咸懷其
德閱九載郡邑諸生交章奏保特陞山東按察司副
使提督學校如故蓋前此所未有也先是積歲糧餉
不敷庠序廩米折半支鈔奏言京師首善之地當以
培養人才爲先不宜吝惜小費詔復舊典士益激昂
久之太常卿員缺吏部侍郎尹旻名欽指案間犀帶
示意政對曰腰金恒愧非據敢溢涯分乎旻遂曰君
言是也遂不果用成化丁亥上疏謂追崇孔子謂當
易大成之號以洗胡元之陋復玄聖之稱以正宋人

避諱之失用示一代崇道盛典會議者加詆斥寢其
疏不行是歲改雲南按察司副使至則繩武弁之尤
無良者數人修舉憲度張弛有道民夷安之甲午獻
績之京至湖湘邁疾還番禺治療逾二載卒年五十
有九政爲人資性淳雅學殖該博存心忠厚不言人
過孝友信義之聲洽于鄉黨廣之薦紳謂可以託妻
寄子者政一人而已

論曰成化末建議者請尊孔子爲廣運帝並去舊號
朝旨不行然不以爲非夫孔子之聖固無待於追崇
然所謂洗胡元之陋正宋人避諱之失則正名意也

詆斥之逢豈其命歟先大父長樂府君稱陳憲副之
賢不容口且曰吾從之遊最久溫乎其外粹乎其中
表裏渾然猶一日也長於自修而短於微名故或毀
方而瓦合噫紀之甌夏之璜旣櫝且瘞猶輝於斗極
君子豈能自掩其善哉記不云乎苟有其言必聞其
聲苟有其車必見其式

雲南按察司副使陳公騏傳

黃佐

陳騏字夢祥南海人少喜技藝工畫能醫有司羅爲
醫生使視重囚入獄中穢不能忍恥之乃學舉子業
爲邑庠生時年二十七矣三十一舉于鄉連登進士
拜大理寺評事晉左寺副修撰羅倫以剛許之陞江
西僉事發奸搃伏有能名分巡嶺北民病瘴以藥活
之者至八百餘人勘虛糧明經界均徭役民不敢欺
有病死而歸以被踢殺告者騏視而祈之曰傷必有
血蔭今肋骨形勢內黑外彼能自內踢耶煮皂角水
洗之黑色盡去獄遂決人服其明巡九江以南火燬

學宮文昌祠凡清出虛糧十八萬三千餘石儲贖罪
穀備賑濟至二十一萬六千石有奇以各道罰罪銀
市材倩工脩理學校祭器及正聖賢像服之不如制
者七十八所毀淫祠九十七區百姓以陳打鬼呼之
陞雲南副使時鎮守太監錢能家人不法每爲騷所
制中傷之遂訐奏落職家居年八十餘卒騷性勁厲
自許晚年論名理與張詡論不協著鳶魚辯原學諸
篇蓋亦自有所得云

月山叢談騷爲江西僉憲初至夢有一虎帶三矢登
其舟覺而異會按問吉安一女子謀殺親夫事有疑

初女子許嫁庠生女富而夫貧女家恒周給之其夫感激每告其憲友周彪彪家亦富嘗聞其女之美而欲求婚後貧士親迎時彪與偕行諺謂之伴郎途中貧士遇盜殺死從行者皆驚散而貧士之父疑女家嫌其貧使人故要於路謀殺其子意欲他適殊不知乃彪所謀欲得其女也遂訟于官問者不察以按女有姦而謀殺夫騃取貧士之父問之云女與人有姦不得其主名使穩婆驗其女又處子乃謂其父曰爾子在學交與誰最密曰有周彪者騃因思曰虎帶三矢而登舟非周彪乎况彪又伴其親迎夢爲是矣起

數日僞移檄下吉安取有學之士修郡志而彪之名
在焉既至驕飲之酒半獨召彪後堂屏左右引彪手
欺息陽謂之曰人言爾殺貧士將娶其妻吾憐汝有
學且此獄一成不可復反異汝當吐實勿欺吾則赦
汝彪錯愕戰慄卽跪而悉陳之驕錄其詞潛令人捕
同謀者一訊而獄成一郡驚以爲神驕爲人慷慨多
大節羅一峰詩云舉世皆婦人惟公獨男子其人可
知矣後遷雲南憲副竟以繩監軍失官今詩卷尚藏
其家或謂此爲牟侔胡僉憲事非

中憲大夫雲南按察司副使朱君文墓碑

李東陽

君姓朱氏諱文字天昭一字天章其先世本毫人系
出唐孝友先生仁軌五代時遷睢陽宋有諱賢者官
兵部郎中致仕與杜祁公輩爲五老會繪像爲卷至
今存焉五傳至直秘閣子榮徙常熟生實錄院修撰
大有再徙吳又三傳至征東儒學提舉德潤世所稱
存復先生者爲君高祖曾祖吉避地崑山人國朝爲
戶科給事中 高皇帝旌其直言賜以錦綺後改中
書舍人遷湖廣按察司僉事 太宗朝復召爲中書

舍人祖諱永安隱弗仕考諱夏居鄉授徒以君貴贈
監察御史妣鄭氏贈孺人君少入蘇州府學爲諸生
有名初業詩旋改春秋再改易成化丁酉舉鄉薦甲
辰擢進士高第連遭二親喪弘治己酉服闋簡入都
察院理刑庚戌授雲南道監察御史承勅稽廣東西
軍籍兼諸司卷牘乙卯巡按福建己未擢湖廣按察
副使專督屯田水利巡按意有所屬君持不下會署
歲考見謂爲治事遲緩例當調用需闕不時得君已
無仕進意命亦不及越三年乃改授雲南君上疏請
老遂不復出其子希周以弘治丙辰狀元及第歷翰

林修撰遷侍讀當被封勅例進中憲大夫正德辛未三月二十八日卒年六十八其生則正統甲子八月二十三日也君贊于吳之王氏封恭人子六人希周最長君性敏而慎言動不苟居官持大體審而能斷博羅軍陸氏妄指鄉人二昆弟爲族而資其費不得又誣其爲故軍陳應二氏子從祖以無副養爲子今二氏顧絕當各還本役君折之曰無副可養子安用二人二人者又豈適皆絕軍之後哉其人乃服閩民有製海船者海商以通外國巡按論商死民當謫戍都察院欲并坐死君疏謂例以擅造大船載違禁貨

物入番市場者處以極刑今民未嘗入番船又非商
所造不當各坐乃皆從末減巴陵有率諸子及母弟
之子共毆殺其異母弟者既皆論死乃誣其弟嘗通
子姁爲子所誣因惡其玷而毆之於是弟之子亦坐
死君曰律罵父者須親告乃坐伯殺其父則讐人也
豈可遽以爲信立命釋之凡此類聞者皆爲一快他
如均龍溪南靖佃法革沙尤水驛夫船減延津二府
餽運浮費增湖廣陂堰令屯田隱匿自首而籍其久
業者雖皆州縣事督令區區悉君手出而名之曰選
緩豈其情哉今希周以文行富川于時君子曰固于

是乎在

雲南按察司副使朱公文墓志銘 王 鑒

朱之先系出唐孝友先生仁軌宋有兵部郎中貫與丞相杜祁公遊所謂睢陽五老者也五傳至直秘閣子榮稚年遭亂南奔始家吳之常熟直閣生實錄院修撰大有徙家吳城又三世爲征東儒學提舉德潤有盛名于元是爲公之高祖曾祖吉戶科給事中以直言被旌遷湖廣按察司僉事名爲中書舍人始徙崑山祖永安考夏皆隱居教授考以公貴贈監察御史公諱文字天昭自幼迺穎迥出輩流游郡庠部使

者程校藝業輒爲首冠舉于鄉輒不利成化丁酉年三十有二始占南畿鄉試甲辰登進士第公初治詩已乃改治春秋又改治易治易未三年遂登第士流服其敏弘治庚戌授雲南道監察御史出按兩廣戎籍凡理戎籍例以搜括隱慝多寡爲殿最蒞其任者率以酷烈爲名公在兩廣獨持平不苛而稽審有法民一言出口洞燭顛末雖斷歸戎籍退無怨言巡按福建風裁整肅衆謂得御史體魏都御史富林副使倭移疾家居咸奏起之時公私殫屈國計無所出而鎮守死者貨財鉅萬輒旣于羣小會福建鎮守陳道

死公乃籍其數以聞冀可佐公帑之乏詔不從是後
鎮守死御史不得復預權貴者始忌之屯田故有額
而隱占于奸氓歲久漫不可考公至湖廣則許民自
首不究切之或得業已久則輸稅而不奪其業民見
公明信率詣官首實公爲政雖若嚴峻而每出于平
恕閩有吳甲治海船商乙以市外番咸坐死公曰甲
造舟而未嘗市番乙市番而舟非所製得減死其他
冤獄尤多所平反政聲流聞法當遷秩上官有不悅
者署其考爲才力不及久之改雲南公曰尚可仕乎
遂上疏乞致仕時國法方峻人爲公危之公不顧卒

俞旨居官幾三十年公私無纖毫過權門要路雖舊
與連未嘗一言自通人有德公者寓書當道薦進公
知之卽還其書不荅曰吾豈可自售也尤善論古今
成敗能以辯博濟其議往往屈人于廣坐之中予與
交幾四十年偉其博重其廉且守而獨疑其過于警
拔不虞乃以不及沮于時銓鑒者其獨謂何物論所
以至今不厭也公以正德六年三月二十八日卒春
秋六十有八子男六長希元賜第一甲第一人及第
今爲翰林侍讀以學行聞于時

雲南按察司副使賀公元忠墓志銘

王 鑒

雲南按察副使賀公諱元忠字澤民其先自宋南渡
來家吳包山之陽曾祖孟安祖文昌世有隱德考廉
以易學魁應天解試歷官九江學訓福建按察知事
以剛直不能隨時告歸授徒吳中今吳中易學最盛
其淵源蓋有自云公得家學之秘成化辛酉占解試
高等壬辰登進士授行人司行人擢江西道監察御
史巡視漕河河道爲通出按廣西風裁凜然剔奸振
滯黜污崇良名聲大振當道者多才之而亦有不悅

郤金亭

者乃除河南按察司僉事以憂去改僉雲南按察司撫夷勦寇茂著勲績鎮守黔國公巡撫巡按僉舉公資望不當尚滯卑官遂進按察副使兵備金齒騰衝時木邦孟養舉兵相攻素歲不解公躬冒嵐瘴諭以威德事且就緒而固以病乞歸矣帳下千人以金贖不受夷人爲作郤金亭以旌其廉云公歸林下凡二十四年歲乙丑詔進亞中大夫正德丙子八月以疾卒春秋七十有八公爲人操執堅定面目嚴冷在道時獨持憲紀輩類御史抑首媿媿不敢出一語親舊或有囑則厲聲曰吾知有國法不知有他他日

有言言事當有跡則又厲聲曰御史以風聞言事必
族發而後舉則焉用御史爲家居久矣雖子弟不敢
媒見泰以御史按閩中還侍立左右惴惴如也近世
仕者多崇第宅廣田園以侈相高公少能以其家富
迄老所居狹隘卑陋終不肯葺一瓦增一屋曰無爲
子孫累也冠服敝舊飲饌菲薄能甘之雖宴享賓客
亦不肯隨俗奢靡值伎樂必望望然去之出入坐一
小航人不知其嘗有官也於乎其可謂焉於自信不
爲流俗所變者耶

雲南提學副使孫公繼芳傳

孫繼芳字世真華容人正德辛未進士初爲刑部山西司主事是時宦官勢盛東廠獲數人誣以爲盜下刑部論尚書命繼芳治之鞠知其寃也卽白尚書曰此人審非盜可寃平民哉尚書命白東廠亦無能奪也卒出數人御史張璞劾天和王廷相迂宦官逮繫獄疏救不報因謝病歸起改兵部車駕司主事陞職方司員外郎毅皇將南巡武選郎黃寧與繼芳百餘人諫止上大怒咸廷筴之繼芳得不死尋改職方掌軍國機務及諸邊鎮書出故謂繁重繼芳日談

笑爲之至奏草時命吏執筆旁立顧口占以書然亦
咸明切引繩墨中事情未幾與部尚書事相牴牾外
補雲南提學副使卒誣摘黜之歸繼芳性慷慨激亢
當其氣所欲言雖萬乘勿畏也其爲提學雲南時數
以事與都御史御史爭都御史御史亦降意溫言解
之嘗爲諸生受學何景明爲舉子亦遊其門故其文
尚典實叙述紀載有班氏風所傳詩僅百餘篇皆精
語惜任直過當遭時排抑然海內豪傑至今尚多知
之

雲南按察司副使申公綸墓志銘 連 鑣

公諱綸字廷言姓申氏別號南濱其先山西屯留人
元季有諱文美者徙居絳縣畱孟里國朝洪武中其
子庸舉文學爲絳學教諭進山東掖縣知縣嘗過廣
平之永年慕其山水之秀遂占籍爲永年人卽公之
高祖也曾祖諱達永樂初以人材徵授禮部主事累
汝寧知府祖諱寧 宣宗朝舉賢良方正考諱廣自
郡掾拜蓬萊典史陞靈璧主簿生平爲人仁厚與物
無忤前妣王氏生紀妣岳氏生公及緒及緝公自幼
聰穎出羣嗜學問弱冠補郡庠弟子員益力於學弘

治戊午領京闈鄉薦乙丑登進士第正德丙寅授山西定襄知縣隨丁外艱己巳改浙江永康復丁內艱壬申服闋改山西平陸平陸地僻民頑素稱難治公推誠愛民刻宿弊崇寬政鋤強植善興學諭俗均徭薄賦甫歲餘政平訟息部使者交薦其賢甲戌銓曹以政優調公太原去之日餞送者數千人老幼流涕有臥轍不忍舍去者太原民悍俗野刁風素熾公下車明法持平風采凜凜健訟者迸息不改月而事克就緒乙亥擢潞州知州時潞久不雨公至膏雨霑足民大悅丁丑擢南京兵部武選司員外郎戊寅轉戶

部廣東司郎中歷官兩部政績偉然庚辰三載考最
得 賜誥贈父如已官贈封其母妻皆宜人嘉靖改
元壬午擢河南衛輝知府至是才識益老練在衛不
勞而治甲申河南諸郡飛蝗蔽天民多患之獨蝗不
入境禾生六穗歲大熟士夫各贈以詩有無冤清漢
獄多稼頌周田之句由是撫按使臣交章疏公治行
爲中州第一乙酉冬述職京師而改調常州之命下
矣明年丙戌朝會吏部推郡守治行卓異者請加宴
賚公首與焉至常益以廉慎視身嚴明蒞政一時家
右斂手避之其政之孚若移風清訟禍雨應耘散殺

賑貧詰奸弭盜與作書院新學官審繁囚簡恭濟式
文演武之數表表可述丁亥擢四川按察司副使明
年戊子至蜀時憲長缺公視篆振風采雪冤滯律茲
貪綏遠夷秉公執法敷恩著威凡所建白鑒鑒如也
偶因議事與按臣不合適己丑大朝考遂以才力不
及解任自是家居數載無復仕進意辛卯夏入京欲
上疏乞致仕不果遂補雲南曲靖等處兵備然意不
欲久居也會明年壬辰大朝得以年老致仕見邸報
脫然歎曰吾年六十有三得生還鄉井足矣抵家躬
於滏河之陽因舊築構室四楹扁曰南濱草堂內有

嘉木數種修竹萬竿足以供清玩勝日角巾野服抱
致騷人墨客相與徜徉其間又倡士夫故老效古人
爲真率會月舉歲週以願養天和郡舉郡飲必敦請
以爲上賓吾廣平宦族雖多求其功成身退當達尊
之榮享林泉之樂好古執禮爲時推重如公者益不
多見人皆卜以遐筭執意末疾一邁竟至不起哉公
生於成化庚寅春秋六十有九嘉靖初詔下均田之
事郡守湘源蔣公忻然舉之事雖再政而聞爲家肯
多田者阻抑公獨奮然堅主不避訕謗後郡守又欲
建通水惠民二閘泄壅沃槁然舂鉞之勞民滋不悅

也公亦委曲詳盡道其便益梗槩以經製之事卒得
濟其隱德之及民者類如此

雲南按察司副使楊公逢春墓志銘

王慎中

西渠楊君名逢春字仁甫泉州同安人由己丑進士授杭州府仁和縣令父喪未至官服除爲蘇州府崑山徵入授南京道御史出爲廣東按察司僉事母喪去職起復僉事爲四川按察司擢湖南布政司叅議積資二十四年始爲按察司副使未至雲南卒于叅議之官舍年五十六君居官竭心奉職凡職所當事事悉力從之事有犯忤人所縮首善避及勞險不可必濟君必引爲己責曰職所有事也直前勇赴不反

顧沮悔常爲巧者所目君初不知久之或知亦不變也曰使衆人智而我爲愚不亦可乎且使吾不思則意貳力分於事寧亦不能如其職矣是吾正有賴於愚也又烏用去之崑山稱富縣前令多以富自沒不能不沒於富而諸獻遺權力猶不敢裁罷君曰費人之財以買聲市恩而詭於不貪人之費斯孰執其咎一切罷之其政寬民急吏賦籍獄牒胥吏不得竄手戶受賦重輕獄當決縱榜示出無不愜服不復求吏知權不在左右也撫按異意條致難遵君据理疏正嘗以理爲君奪江南諸郡邑以歲時愧畱臺爲常

君入臺魄不敢至曰是嘗爲崑山盡罷諸獻遺者不
可囑也巡視江南北倉庾汰黜滯貪風未振竦所部
廣屬吏滋多人人如君臨之在廣東分巡嶺南道疆
界遐曠徭種蕃育其中數爲民患故嶺南兼有兵戎
之寄法弛日久將玩卒惰賊白日剽通道行旅梗塞
相爲蒙蔽以苟歲月而已君首舉綱維責郡縣以修
政息民之要然後易置將領選卒訓練指授方略自
是賊發輒得野聚荒村開戶而睚矣在蜀領璽書專
以監屯爲職最號煩劇利源所在豪右穴之君綜制
成額按籍考要年侵月虧瞭然可見僞巧之所飾課

入日進時叙州戎縣都蠻畔殺略吏民長寧戎瑨一路邊無居人監司相顧莫肯發口君獨抗言且設禦取之策撫按相與謀非楊僉事不能辦此會檄以都蠻之役委君君至益用耳目知蠻敢爲不靖由屢撫養其驕桀之性非盡勦之後益不可爲度險阨分兵四路約期進勦君復計蠻素以撫徯我若因而誘之宜必我徯得之易也陽撫其四鄉而以勦二鄉爲師名果得四鄉最桀者四十人以來盡殲之用是兵入有功俘斬以千計湖廣分部潭邵之間戶多亾逃客戶据其田逋稅猶責主戶之存者故亾益多而逋殆

不可校君爲法使稅常附田以行田與稅不得相失而互爲有無也平賦均役通滯節冗事集而令不煩其在職獨久復因暇日興起禮教訓勵生徒士奮於學者彬彬然盛矣所至盡心於職大較如此故其以憂去嶺南以遷官去蜀民皆若失所怙相與泣曰猶蠻復苦我矣其卒於湖南民走哭相踵不絕喪歸罷市舉聲以過喪出境乃已君在崑山邑有故相當國子弟僮奴暴里中君置之法移書都下懇惻侃切言以德爲愛之意故相報謝暴者終君之任益戢嘗欲奉其父祀于鄉賢祠邑子論有異同君持之故相滋

不悅然未嘗敢短君也爲御史值 東宮備官察時

相引置私人物論大譁君首彈之相權寵方盛莫敢

齒反 上覽君疏爲易置所引用者時相氣大沮欲

中君以事而有所畏遂以僉事出君臺中在嶺南韶

州守倚故相大爲奸利總制撫臣憚相權益優異之

君白發其奸撫臣搖手君曰坐視民患不除不能一

日安於位除患而以禍去心所安也撫臣內惡其言

而奪於君之法韶守竟不免此皆其悉力於職人以

爲愚而君喜爲之者其在蜀都蠻之叛非君職也直

一責在職者偷事病民遂以身任之功成而賞不以
所以得訪久而後白然君仕雖不忠化而正論者之

雲南按察司副使曹公達墓志銘 王世貞

蓋嘉隆之際有直臣焉曰按察副使曹公達而曹公之爲御史也甫朞而挾其儕軀故佞宰汪不法語峻甚上杖之五十謫外而亦爲絀宰汪以解公方臥兩緹騎囊過宰汪第忽挺立指而詈曰若尚能肩背入長安門耶徐徐步歸邸待命得隨州判官而萌是君按司隸有林某者游權貴間以事請昧公寘之法而翟某者爲林與主迫以權貴書居間復寘之法京師日相攝強項曹矣而公之判隨州也楊嶽水公督焦峴之民以俸緡倡賞格賞援者所全活無算攝斬

水令 章聖皇太后梓宮歸顯陵當道斬水郡縣貢
供帳甚急公第飭吏民手板水次已公服前引常庾
外不庀一錢曰吾斬水非中貴人外藏也中貴人問
而知爲公驚曰是故強項曹耶猶崑然御史會風便
引帆去而公遷南城令爲真矣公之令南城善狀非
一而大者若汰坊廂役崇學校邑有婦貞棄於淫姑
以死者公訶得狀聞於上而旌之至公遷去南城與
斬木人後先爲生祠以祀公至今勿絕公爲南繕部
主事遂遷郎中領蘆洲公領蘆洲而蘆利瓜剖之官
民豪不得從中牟尺寸矣凡三年而遷知廣州府廣

會府吏敝蝟集公一切以惠文埽之若洗始公令南城而御史汰以苛禮望公公拂衣出曰吾御史豈而比耶以是頗得難上聲而公繇廣入覲順德丞趙某夜行金贖怒叱出之會公至自覲趙丞坐昧露臬司以屬公公治極法且抵罪而巡按楊御史故與丞有連欲有所縱台公持之益力御史恚而邑加公公曰趙丞善行金舍之固當亦竟拂衣出而御史業已中阻監司有恨公者爲陰喝曰守飛書中道矣則又曰守候三司集庭欲辱公矣御史窘乃誣公它罪狀詔卽就訊而公上疏自白竟得雲南守而丞及御史

相繼罷謫縉紳快之公守雲南雲南亦會府其治如
廣以最聞遂擢其省按察副使治兵備臨安夷酋普
憲阻兵公奮身請以所部深入憲巢卒縛之而撫使
者以非初議格其功更爲飛語聞當調公遂歸人謂
公調不當更內地耶且久資以非時摧耳公咲曰吾
往者白吾蟻而今不白者不吾蟻也且吾官三十年
而幸有老母在而忍倍母出也公家居不以非時謁
守令卽守令或宗戚之顯重而過舉者面斥之不少
假亦素熟公爲人無忤也公少貧爲諸生日一粥自
給及其貴而老非客至不三益客或風公力不能南

三篴耶公謂視諸君誠儉然視吾諸生時則已豐卒
以隆慶辛未得年七十有七公宇履中其先爲常熟
福山人已徙邑之沙溪後割沙溪屬大舍遂爲大舍
人因自號曰沙溪

雲南按察司按察副使楊公道亨墓志銘

王世貞

蓋予讀楊公狀而悲之當公之守真定也見公不以天下第一者而一撫臣欲中公以快當事意輒論罷公夫以天下之好不能勝一人而公就屈卽所恃者天耳而公何事竟白公當復故官然復官之命下而公先已卒矣語云天道無親常與善人公所恃者天歟非耶公守真定爲三輔最大郡庭五州二十七邑之長而臨之而上乃有諸督撫臺察兵巡見臨者以十數又當東西孔道冠蓋羽檄肩摩卽守食寢弗遑

也而公素彊力自勵又嘗爲李官讞斷益習吏抱案請署公先所急者次第呼署而扶其不當請者曰太守廼爲猾胥作地耶諸州邑受約束者以次授案去兩造紛爭前而呶公不顧第撻其中要竅呼一二紀訟大猾厲聲曰而不吐實立碎汝首矣以故公所聽訟不數語而決故事中以夜分臨獄公之始至猶肝非久而崇朝矣鄆置供張甚設其造請諸公不避賢然所饋不過筭器食自恒賦外一不以煩吏民而會虜騎入紫荊畿輔大震公行視郡三面皆土城歎曰地幾不與虜共耶顧郡有汰錢若干千緡反曠吏脫

騎俸給悉藉之以白於臺請因石於山因陶於土度
三面咸甃石之不匝月而畢趙民忘興公又益濬濠
及築潭沱廢堤以外拒水而內護濠久之潭沱挾霖
雨而水橫來爭堤且潰公督僚吏多益置上牛木筏
之類捍之而身露立城上慷慨爲文以禱及禱而水
有若青羊者一目獨角叩首而逝水亦隨減當公之
出禱也民之薄於堤者以千數丙夜不寐色號呼請
救忽故神祠光熒然有二燭浮出因傳炬以免咸加
額稱公神君神君云而公又奏蠲其歲賦之半諸上
賦金郡例有火耗或五十之三以供守費公一切革

之民益用大悅謳謠載道而前所謂撫臣者不欲言
其人故公同年進士也與御史不相能屬公司其狀
公念已守土大吏安可首鼠闕兩監司但委曲引大
體覲消其嫌而御史內材公所措置多與謀滿首薦
公而劾撫臣所私者撫臣大望公謂背我而新鄭公
當國惡故相爲公鄉人嘗道出真定以言微嘗公公
遂巡謝不敢知而撫臣者故新鄭客窺得之大喜謂
公奇貨可居矣公嘗修郡城垣學宮陰陽醫藥公署
度之費無所出會有倉羨粟四百石公以付工使計
受直曰公所事請也而公旣遷雲南按察副使以去

則用前事疏奏公謂有所乾沒當罷詔聽歸就戮公道聞之笑曰太守有州五邑二十七爲三十二城一輦而城可百金乃愛此紅腐粟耶且撫臣兢兢欲肉我而自此腐粟四百石外不能以毛髮饑我彼猶人也吾安所解何公乃歸耕楊扇與其諸從季飲甚歡然以數飲得脾疾久之寢革貽書陳懿德先生謂受上恩無以報卽不我白我無所愧地下也適卒而所論公事下彼御史責問諸匠作受直咸有狀因延見吏民詢公賢否吏民叩首流血講曰楊使君僅飲一杯水而奈何以腐粟饑之或謂使君卽不白我曹

願得死代御史乃上疏略曰雲南按察副使故真定
守道亨材而廉守也廉者必不盜倉府粟材守而貪
亦必不須此倉府粟且粟授直工工皆有狀詔特復
公按察副使以示優而公不及見矣公頎而長身風
骨聳秀而溫然謙卑長者性孝友居父怡山公母馮
宜人喪以毀瘠聞事繼母馮太宜人共養腆備諸弟
道通輩咸依公所以撫教甚篤而其逝者子其孤亾
間也旣以貴念獨居饒而使區困役日就約因割腴
田六百畝助之以故公病而里中人爲飯僧禱神歿
而巷哭聚吊若市然公少年爲諸生則已有聲數試

有司數不利者博士家言凡數萬餘始得解又踰年
始成丙辰進士授行人出使諸藩以秉禮最其官當
遷爲給事御史而居與御史大夫隣大夫之奴與他
惡少詢而誤謂公奴也間之僅得刑部某司主事稍
遷負外郎以至某司郎中公極精勤於職當是時西
曹郎名能法比者亾如公其名善博士家言至古文
辭亦亾如公竟不調而以積貲僅得守守而始得大
郡然其遷副使則在萬里外甫遷而劾繼之劾甫白
而公已卒公真無天哉悲夫陳先生曰山海經所稱
泰戲之山滹沱之水出焉有獸如羊一角一目其名

辣辣公所禱而見者耶彼猶獸也而能使水隨而退者何也神祠之燭胡自出而應公以出千夫於溺且聞之趙民旱公再祈而再得雨則公不謂無天也公字豫甫別號九華山人其先避世於華亭之修竹鄉遂家焉子孫益蕃衍環澱湖而居者亾他楊而邑人以區爲扇遂稱爲楊扇君所自產也父卽怡山公母平繼母馮俱以公刑部郎貴贈封

雲南按察司僉事邵先生王墓表 李東陽

先生姓邵氏諱玉字德溫其先寧波慈谿人也四世祖承事郎馮二府君徙居鄞曾祖維乙祖子文考敬先先生爲縣生舉宣德十年鄉薦正統元年登禮部乙榜授汝州學正歷遷南寧河間二府學教授合九年考最吏部遷順天始以京秩入流品會朝廷命大臣會薦可爲按察督天下學校者先生用兵部尚書馬公昂薦超擢雲南僉事兼督貴州未幾陞馬傷足遽謝事以去居十有餘年乃卒先生生永樂五年卒成化五年壽六十有三先生學本諸經傳涉史傳

爲文章典雅有法氣象嚴毅行甚謹不苟爲酬應爲
教必先孝弟忠三者期以磨濯士行爲天下用在順
天雖不久任諸生思之至今繼教者皆莫及焉在雲
南不遐遺其人凡所按試冒險阻窮歲月未嘗色倦
三應聘爲考試官山東西俱號得士而江西得故侍
讀彭公放爲解首若今學士張公元禎禮侍郎傅公
翰董公越祭酒羅公璟皆時名士鄉榜之盛無與爲
比嗟夫作人選士之典在國家爲最重今倚席以教
定額以試曰是足矣求才稱其職竭志力以圖事成
者幾人哉閱世幾久知人才不易得前輩之不可復

見奈之何不爲先生悼也謹以是表請墓先生在汝
設饘粥以救饑民在山東有士子囊金求舉斥弗納
在山西作誓心詩以見志在雲南見道旁羣婦稱夫
死戍携幼而啼饑者胥有司查其籍原於官此其懿
行善政在人耳目者

雲南按察司僉事林公淮傳

郡志

林淮字長深淮早喪父養母孝成化十一年進士拜
刑部主事卽奉母入養京師旦就郎署必戒婦飲食
盡恭久之母念家鄉切遂引疾歸旣三載部檄趣供
職淮以京師苦寒將母不便迺疏乞改南京刑部遷
員外郎弘治改元陞雲南僉事淮曰往棄北就南爲
養母也今雲南去京師萬餘里吾母豈宜往乃自陳
情願爲近地學職使得養母詔允其請乃以淮爲常
州府教授親終復注僉事如初淮就學職居二年母
以病卒淮哀毀扶櫬到家亦卒淮初入刑部永平有

疑獄一家十八人坐死前官持兩端不決淮一訊卽
人服其明允嘗當盛夏提獄命人汛掃吳穢及剪
剃老囚髮日煮艾湯與浴彌月囚無度死者淮有女
弟適人母愛之每迎養必挾與俱大槩淮操行於倫
理爲最重云

雲南按察司僉事林公希元傳

林希元字茂貞自幼嗜學讀書遲而甚刻苦其寢處衣食有人所不堪者其於研究義理解析文字尤極其精以儒士中正德丙子鄉試三場巡按胡公文靜得其卷命特給以燭宴鹿鳴之日布政伍公符謂曰公異日必大用以其感異夢云連登丁丑進士授南京大理寺左寺評事執法不阿中貴決疑獄十餘事不可盡述皆人所不敢爲而公獨任之聲稱籍甚至畱都有鐵漢之謠世廟登極公應詔條上新政八要有君道急務六朝廷大政二八要皆深切時弊中

清言路革鎮守二事最爲人所難言言官以是切恨
旋遷寺正有巡城御史譚魯者有所私問斷不關法
司已而問者家訟冤法司法司過寺公謂故事凡京
圻有獄自杖徒以上無不移部寺問理平允非成法
有駁譚請史詹林三御史爲解不從囑堂官爲解不
從遂誣以抗拒罪謫泗州判官堂卿陳琳同僚鍾君
雲瑞求贈言祭酒崔公銑作說鉉以相贈皆以聖賢
事業相勸勉而舒公芬亦謂今日道喪之時惟所論
德義之勇曰和而不流中立而不倚足可救時公至
酒盡心職事竟以抗節不屈當路遂棄官歸家居三

年以讀書解經爲事值

世宗皇帝銳意中興校羅

賢俊少宰方公獻夫詹事霍公韜列故副使莊渠魏
公校并公十人以聞奉旨推用公起北大理寺副

未至任尋陞廣東鹽屯僉事陞南大理寺丞時正

上特點公益有意於大用公也公自爲寺屬已有聲

至是益練習法所當加不少假借事涉權貴無所迴

避然或獄事有難決必與屬官反覆辨論至停允而

後已時國子祭酒王公道司業歐陽公德並以理學

名公往復其間不專名已見而於二公之說亦有所

折衷不盡從也四書易經存疑於是再更定而古文

類抄出焉適大同軍叛公連上二疏詞極懇切竟爲
當道所阻秩滿畱北會遼東軍士以都御史呂公經
清屯田不便已窘辱之朝議差官體勘公上疏極論
姑息之弊請用兵且曰人臣有出力以定國家之是
而不係乎疏與戚犯忌諱以決天下之大計而不計
乎利與害者臣希元是也天下聞而壯之疏入忤
旨遂落職知欽州會安南事起公議復四崗上言安
南可取狀凡六疏 上覽奏甚悅命四省臣調集兵
糧以待而特遣本兵毛公伯溫咸寧侯仇公鸞往徂
征未入其境而登庸子方瀛已爲其民所殺登庸計

窮納款終始悉入公策意必欲如國初郡縣設也奈
夏公言素不悅公因排其議以保境息民爲詞天
子竟不憚而罷姑以安南國爲都統司登庸爲其使
其實安南未嘗爲司登庸使號亦未受也千載之功
竟以一言阻之良可惜哉公旋摧海北道兵衛僉事
竟得罪罷歸乃著太極圖解春秋質斌讀史疑斷訓
蒙四言考古異文批點四書程文宋繩尺論表策等
書行于世學者稱爲次崖先生年八十五終于家死
二十餘年乃祀于鄉益特出于督學太倉王副使之
意且有特祀之議時詘未克舉也

張僉臬公澤傳

方學漸

嘉靖丙寅八月十有四日張公以僉臬討鳳繼祖死之賜重書贈光祿少卿廟額忠節歲時祭祀厓一子有司樹石於皖城之衢曰仗節滇南而吾鄉之評忠烈者必推張公云公家桐城雲田之坂人謂張雲田高祖傑累千金好行其德歲祲出粟千石周鄰里供佛動十數金家用是落有鄰叟夢大石立其庭金標古篆不盡曉惟記澤被萬里四字明年公生傑名之曰澤字大被從夢也公冲年穎異七歲授論語至卅父母竭力事君致身喟然歎曰忠孝當如是夫厥舅

文學王亭奇之曰此兒識度非常長克郡諸生名能
文章人多從之遊公語其弟子曰二三子欲爲聖賢
乎將榮肥是計乎先正之訓謂何而升斗爲榮實惟
六經之辱蹢躅獨立鮮知之者少司徒盛公汝謙獨
重之數過廬劇論移日嘉靖戊戌選貢計偕丁未授
沅江令沅多曠土招民開墾資牛種省什陌沅江大
治武陵請攝故事長吏不他攝公乃沅江攝武陵武
陵有洞寇公率兵禦之佯却縱賊大掠翼日復却賊
懈陰使奇兵擣其巢獲渠魁遂平無何以憂去兩邑
民爭挽其輶歸而不能具喪禮稱貸襄事旣闕補巫

山巫山舊無驛里甲資繁初一驛巫山便之稅茶歲
有例公卻之以克茶商之贖大饑興發捐俸爲粥飼
羸庀存活甚衆俗尚女巫杖之火其神巫風頓息戊
午升衛州別駕通賦者盈囷囷寬爲期而出之感泣
爭輸逋矣自奉甚約民稱張青天會龍游常山皆乏
令監司使攝龍游矣而常山之民要之曰張公美而
薄常山監司乃復從常山請而益賢公時督府胡公
宗憲威傾兩浙其前驅求索無厭二千石以下唯唯
公獨縛而杖之曰其情欲解綬去胡公更延以賓禮
戒部下曰而不知此郡有廉吏乎供具減十之五督

府新募之兵數百擁主糧者而譟竟日公馳而諭之
曰張公至矣遂凜然散有礦寇擾處州傷官軍將及
于衛衛守議避之公曰不可單騎諭以威福給米數
石曰爲爾歸餉毋擾一方民寇退相戒不入衛癸亥
陞廣安知州道出巫山巫山民扶老攜弱牽帷而呼
車不得前公步行數里至廣安一日而決淹獄五十
出黃明義等五人十餘年之冤于獄置釜薪廳前訟
者徑入炊廳下須臾決判而去民歌之曰張不解袋
焉知闌開立二倉令有罪重者入米輕入穀逾年得
米穀千餘斛爲往來橋賑博上生貧者之婚葬歲數

百金有推官皮姓者至索賂公不應因閉署戒閤人勿入知州公遂壞垣而入曰澤有案請君探之而吾亦請探君橐皮大慚宵遁入計自治駟不以煩民先是銓曹書其名于壁曰天下廉吏張澤相國徐公階聞其賢招之曰同鄉也何難一顧公曰羣吏兢兢聽冢宰之黜陟某不肖何敢私謁相公請辭于是銓曹奏治行爲天下第一乙丑擢僉憲雲南公去家萬里兩僮自隨歷舊治不使人知分巡安普當道雅重之事輒委印累累者七簿書勿一益勵精不遑食尋改巡武定鳳繼祖者武定之屬夷其兄爲酋長卒而無

子其婦護印益其俗也繼祖謀奪印治兵攻其嫂遂拒命中丞直指使議討之公曰小醜而動大衆不武以夷攻夷不得其死命損威授我千金師一旅不旬月可計擒而獻之麾下不聽使公監夷軍五百前發公歎曰我欲計萬全而當道疑我怯耶遂毅然往誓師忠義奮發衆皆感動一戰而勝賊走險部將哈囉銀曰險恐有伏搜不得追及戰復勝賊疾走渡河銀升高無所見公曰破竹之勢不可失分兵爲四哨約竝濟自當一哨麾其衆前半渡伏起截流而鼓三哨不及援兵潰賊以夷語調熟夷得公狀執之公居賊

纂衣冠危坐時讓以大義賊皆俛首稱張爺烈士踰
半月督臣調大兵討賊兵四集賊置酒獻千金爲壽
願得手書移軍門乞赦公叱之曰天朝大臣奉命討
賊寧爲賊作說客耶賊曰不書則刃之公又叱曰死
則死耳刃何怵焉賊乃使輕騎送公還而拘留其侍
衛惟百夫長胡翰一僮張時用從行至山谷有鐵騎
草萊中躍出公遂遇害翰時用皆死三日賊歸公屍
面色如生督臣攻益急踰月誅繼祖賊平公櫬葬還
一子斯盛廕入監今後府經歷萬曆中公進階奉政
大夫方生曰君死國守臣死封疆將領死行陣士死

綏百有司死事明有義也張公得其死矣豈不參天
地光日月與顏常山張睢陽文相國王待制諸君子
齊名哉當其片語戢兵單騎止寇一別駕見憚督府
不獨才勝節固懾之矣剛介之士往往踈于拊字而
所至以循良稱今去思碑五生祠二忠節祠一祠鄉
賢者二沒世不忘非耶滇南萬里與夢符張公殆天
授已

雲南按察司經歷劉遠先墓表 陸 榮

紹卿自太學生得按察司經歷銓注雲南先是余以
給事中言事謫貴州都勻驛云貴接壤皆古西南
夷地貴州地尤瘠惡非人所居余行數月乃至境上
屬盛夏暑雨所經由皆大山長坂下上勞憊盡日道
無行人俄有騎而自後至者紹卿也與俱憩坐林樾
間語相勞苦仰視山兩崖斗絕數百千丈色如積鐵
霧氣淳淳起山巔虎跡交錯道上紹卿憮然不樂余
顧笑曰子悔來耶丈夫不經此當何由知艱難子行
矣紹卿亦笑且頷之上馬去余至都勻會驛舍久廢

就居平越平越者雲貴往來孔道也諸自雲南來者
時時傳說有新官劉經歷者彊執不受請託蠻酋武
官放恣淫虐不畏大官府獨難劉經歷耳余聞之良
喜自余去平越及歸吳中三四年間與紹卿不相聞
既而紹卿上計京師撫按者署其考爲諸幕官最當
遷秩矣廼有飛語聞吏部於是以不謹罷則聞有按
察官以細故相望實陰中之云紹卿自失官家居十
餘年病卒卒後若干月且葬其子瑊詣余泣請表墓
余許諾因爲道往時事曰吾知若父久矣忍無以慰
其死哉紹卿諱遠先世家臨江國朝有編戍蘇衛者

今爲蘇人自其從祖父刑部尚書與清始起進士至
大官父佃母陳氏紹卿生有至性十四喪父執喪循
禮而力學工書事母以孝聞在雲南蒞政明決上官
才之事多倚成焉所平亭疑獄甚多上官楊訓殺人
帥府桀黠奴高壁亦坐事當謫戍兩人要重貨投之
不納卒案致如律千戶胡學詩戕其妻行賕要人脫
罪一詢得實狀論死王昇者鬪奪殺人道中郡吏名
捕之一兵官子亦王姓而昇疑懼自斃爲吏所錄旣
誣服成獄矣紹卿往覈按立得殺人者而出兵官子
歲機視督平糶計會詳密而賦授必均民以不殍死
獻徵錄

聞視迤東諸郡庾積姦蠹爲清他所建易尚多不悉
紀令任職差久其功緒當益有可觀者顧僅逾一考
輒以腌昧之過去談者惜之或曰紹卿平生剛急少
醞藉用此觸忤貴人卒見廢退斯自取之也非耶余
謂不然夫仕在不失已耳乃禍福則有不可知者昌
黎公曰祗繫其逢不繫巧愚信矣今世仕者或工於
語言日蒲伏公卿戶下拜起望顏色然其人固自有
利不利利則躡取華要不利亦放棄流落死耳受之
榮達有定分非必以諂倣爲通塞也如紹卿雖飢寒
食貧以終亦何恨哉亦何恨哉

雲南府知府杜公棠傳

杜棠字善政三原人儀貌豐偉剛毅寡合獨與靖川
處士馬尚賓爲友專物洽聞經明行修尤善星遁風
角之術由鄉舉任真定通判調彰德時靖遠伯王公
驥征麓川舉軍前占望運籌爲衆耳目賊平上賜
美女一人仍陞兵部職方司郎中尋督戎政錄功間
兵部尚書于公問命棠曰公某年當無枕而眠于惡
之止增四品俸調南京戶部所在人以識大體稱南
部堂後樹忽冬花衆無其長曰此堂尊之瑞也棠正
色曰冬花春秋書異何瑞之有其剛正類如此性至

孝母喪廬於墓側時友人馬尚賓掛股和羹養親愈
疾涇陽處士師維學亦執喪廬墓遠近稱三孝焉後
陞雲南知府政績著聞以老乞致仕詔進三品階通
議大夫卒年八十一在雲南日靖川處士卒公思之
不置求有能招魂者招之至與話舊詠詩而別故鄉
人稱公與靖川爲生死交云

楚雄府知府朱公繼祖墓志銘 楊 廉

公朱氏諱繼祖字孝思別號慕菴世家高安由邑之高倉一徙碧雞坊再徙坡山代有聞人曾祖諱仲益永樂乙未進士累官刑部郎中祖諱子昂號北湖居士父諱正已贈兵部主事母胡氏贈安人公賦質醇厚一切戲謔皆不樂爲而內極朗徹書記於心不復遺忘成化甲午舉于鄉甲辰舉禮部策大廷以進十出身授兵部職方主事守山海關歲察嚴甚犯者雖權貴無所貸人謂不愧鎖鑰之寄也滿三載還轉武庫員外郎郎中常押配女直夷人於廣東至甫二日

卽竣事而回。金匱錢之不可得他如裁省錦衣新
隸斟定外官馬丁附屬軍冊革專差之擾以靜驛傳
皆公所建白著之令甲至今者也。轉雲南廣西府知
府推誠撫字典水利立社學有養有教未嘗鄙夷其
民前此叛者如龍俊普清諸酋長次第納款盜發竹
子山奉當道檄督兵往勦之逾月奏捷朝廷嘉其功
有寶鏐文綺之賚當報政之期撫巡交薦更治楚雄
二郡皆在京師萬里外而後郡之較先郡爲之似差
易者而公處之若尤難焉故至卽翕然稱理景東土
官知府陶洪跋扈一方十數年如唐之藩鎮公復奉

當道檄單騎而往衆皆危之公飲食起居不爲隄備
惟赤心置人腹中開譬逆順如數黑白洪卒伏罪其
境遂平人謂賢於數萬甲兵居二歲卽上疏致其事
公撫世酬物不爲矯亢然趨承之事素所弗欲故當
其在部爲人擠排出乏遠地及其在郡亦以取忤上
官浩然而歸家居惟以教訓子孫爲務間與親舊叙
違濶陳說平生吟詩飲酒惟如也子定昌初以御史
在北爲迎養計得乞南至家懇請竟不至大意謂謝
事以來城府尚不欲入而况於都下哉蓋其晚年喜
靜如此公生止統己巳二月卒正德戊寅九月享年

七十公三十六而釋褐五十六而挂冠仕不爲早遁
養益深而設施有其具歸不爲遲勞逸相半而初心
無所違積階中憲大夫致仕後過 覃恩進亞中大
夫爲人孝友天至恒念二親不及祿養服食必自貶
損俸錢所入推之同氣并同宗之貧者與人言必傾
盡雖童稚無所欺咸稱其長者所爲詩文名雙溪存
榮

雲南曲靖軍民府知府龐公嵩傳 京學志

公名嵩字振卿居南海翁唐鄉學者稱爲翁唐先生
嘉靖甲辰由鄉舉授應天府通判晉治中先後凡八
年大京屯缺屢攝府事初至旱魃爲災公督賑委悉
霑洽公粟旣竭貸之鄉先生富民誠意懇惻人多應
者所全活六萬七千有奇已而蠲其積逋于以勞來
拊循之所繇以復業者十萬六千有奇所部民苦役
重公取公費議寬之令甲首輸免其直辦付之印
簿以防侵漁清寄居客戶以助夫役移解驛馬足以
馳衝塗覈冒濫優免及詭稱官戶寄庄戶女戶神帛

堂匠戶以實丁口八邑皆蒙惠焉時江寧葛仙永豐
二鄉數有水患居民餘七戶而已歲課不能辦公爲
築堤闢萊得田三千六百畝立惠民庄四名貧民佃
之流移盡還而全邑訖無代輸之苦百姓至今賴之
折獄無細大必得其情有張元二者以追逃婦不反
公躬至婦所見室畔縣堽矗立林木颯然心動行數
十武而前佯執村老訶問之對曰我但見屍遂得元
二被殺狀又高淳傭人凶其妻妻家以爲死執之公
偵知隣有畫工以其妻歸日遜也計致肅工奪還之
聞者以爲神戚畹王湧舉人彭若龍占良人妻殺人

公并論死居間者萬方拒不聽公饒吏幹在事拮据
百廢具舉尤加意造士暇則進諸生課之自捐俸以
資賞給歷寒暑無倦淹通五經爲諸生發疑抉異無
不虛往實歸者早遊王陽明湛甘泉兩先生之門至
是奉其緒論爲諸生規建會于新泉書院日與講習
以故一時文行之士成就興起者爲多公天性嚴明
肅然不可犯而又與有閒于名儒巨公以是施之政
亦以是持其身見義勇爲獨信一力雖貴育不能奪
也單騎行縣所至肅然一疏片楮不以煩民人目爲
鳳青天云府在六年京察例而復與觀察公謂非理

上疏請止之至今著爲準今晉南刑部郎中曲靖軍
民府知府在所士民銜德旣去而追思之葛仙鄉有
特祠至今俎豆不絕云

知府鄭海亭溥墓志銘

王慎中

嘉靖壬辰進士待銓吏部凡若干人江南北巨縣以缺令告者數十縣之人仕都下各爲其縣擇令交欲得鄭君而無錫有秦鳳山尚書與諸朝官顯者十數人竟爲其縣得鄭君他縣不能得皆若有失無錫諸顯者與尚書公交相賀以得鄭君其時于方佐銓司以與無錫以鄭君受德於其縣人無錫故名爲宦而多仕者爲令者往往朘取殄用其財而逆以懷故博嫉士大夫君至按都鄙賦役之籍資以諏訪得其禮俗所由壞歎曰茲邑生迫而斂重若此乃謬以富得

名民方以綸修邀佚招四方之目其美以免因語民
以奢敗儉存設陳得失禁戒明白發於惇惻自以裁
貶一身服御爲率至其張具上官館遇過客交際士
大夫舉損於舊度豐約之中使財僅足以成禮而不
爲浮尤吝興作舍館升輿苟有可因不安變革曰勞
民以悅人非吾心也既不匿財以傷民心始稍取境
內一二巨室傾放難論者重寘之法以示威曰如是
足以致刑矣一與民相安爲寬平暇則與士大夫相
賓接驩不失節士大夫憚以私溷君聽近勅其家亦
莫敢有撓也客或見君坐縣堂從容不苛庭中常空

異於東西行過縣所見怪胡能然君曰惟不擾人以
自累耳君固精經學善爲舉子業邑子多才而講習
乖刺文不傳於經君爲指授大義日開月益邑子咸
知所以爲文至今科目接跡猶出君門下士爲多張
運使公愷清德純行一鄉耆望張給事選以直諫廢
貧王進士問病免家居喜文學君敬事運使公與給
事進士游加親貢士施子羽能詩老儒李黼工註詁
皆優與爲禮君與人無忤其溫而有辨又不苟然也
巡撫中丞部使者蒞昆陵廉無錫治行爲畿內最交
薦之君性恬簡寡將迎又無錢治苞苴以買進秩滿

僅得南京戶部主事以去畱都民曹事簡君益爲深
厚閉戶讀書恥與嬛捷之士競泊如也以其間爲古
文詞據理確質有儒術之體重自掩匿不求以名在
職隨事展力未嘗苟且而惡爲皦皦維揚置分司權
舟有大小二關舊皆征之君往司權謂某府史曰征
利而爲是鍼細髮密雖取贏胡足貴通其小關恣舟
行莫誰何之權計以足乃知諸爲細密者非專爲國
增計也積資貲外郎中擢雲南府知府未赴任以父
喪歸喪免侍母不忍去左右居歲餘母病卒始免父
喪母勉之行君戀戀膝下竟得奉母之終君爲戶部

以其官封父殖菴公元爲戶部員外郎母伍氏爲大
宜人在無錫迎父母就祿養治喪葬合禮於二親生
卒且致其情克名爲子服除赴銓驟感疾旅卒都下
實庚戌十月十日距生弘治乙卯年五十有六耳君
始至銓江南大郡交欲擇君而毘陵人以無錫治最
故欲得之尤力聞其卒皆相吊君名普字汝德籍于
南安之郭前村

尋甸府知府戴公鰲墓志銘

張時徹

公系出宋戴公後其裔散處台之黃巖至諱陽者始徙鄞桃源歷傳至公曾祖鍾贈承德郎東昌府通判祖浩由通判歷雷永鞏昌三府知府父櫟迪城縣學教諭封奉直大夫南京刑部員外郎母杜氏封宜人公諱鰲字時鎮別號靜山生有奇質七歲誦書卽了大義甫弱冠登乙卯鄉薦己未進士除太和縣尹以經術飾吏治所治獄詞精核如老吏豪民虛振聞風遁去幕吏大源網隆壽民操法逐之貪斬草薶增城固防大儲穀粟以備凶饑民用康又撫按交疏其賢

調揚州興化縣時適大侵至有相殺以食者乃請粟
三萬餘石凡賑民二萬六千有奇瘞路草二千三百
有奇收遺棄小兒官爲哺養民病者與藥田者與種
通者緩征其有豪暴里中如朱德丁田者捕而誅之
政譽籍籍一如太和陞廣東韶州府同知撫定蠻寇
用之討賊輒爾奏功四封宴然時所屬巡檢洪穆與
其妻病死于旅則爲殮之而佐其子以歸楓陞南京
刑部員外郎郎中決遣如流庭無滯獄時有鎮江程
珩程環者以聞毆搆訟而與鄉之鉅宦有怨欲寘之
死公曰殺人媚人而可爲乎竟當之遣戍會其人乘

銓以公守尋甸益擯之也時遇旱恩獲封父母妻已而抵官郡故夷也官司學校不立吉凶無禮俎豆不修犬猪狼噬者皆是也公乃歎曰嗟乎斯鄉民也夷哉吏之弗華也而欲民之無夷外矣乃歃土城開府治立學校建師儒有城有墜有壇有倉有平祠舍館有陰陽醫學飲射讀法彬彬比於上國矣如是者六載以奏績行素以不能善事上官被論謫秩久之郡士民且長于孫矣而誦說功德者不絕後守林斌乃以羣衆之情貽文鄉郡以表遺愛云公之歸也謹祠事睦宗族凡關人倫風教者靡不用其情而雅好山

水喜賓客築芳洲別業已又築會川亭館日燕息歌
詠其中賓至則擷蔬摘果醴酒烹雌酣賞爲歡不待
外求也古今圖史徧陳齋閒時取而誦之有所會意
輒起而劄記至盈箱牘矣此其度豈妮妮緇垢者哉
嘉靖己未十一月偶以末疾終享年八十有八同母
弟鯨布政司叅議暨都察院右副都御史巡撫四川
鰲工部主事

楚雄府知府王好學傳

縣志

王好學字道卿樂亭人嘉靖庚子舉人知陳畱拍人
蠲逋弭盜修學三年遷知澤州所屬沁水有成化間
李瀚知樂亭有遺澤好學未生也至是過而記之又
加惠其子孫曰吾邑賢父母後也敢不必恭茲止乎
三年遷歸德同知澤民祠祀之如陳畱而歸德扶服
歸起太原石州新被虜居民無圖志爲立戟守策曰
之部使者遂檄視石州如所置專遷戶部員外郎督
餉昌平轉郎中遷楚雄知府歎曰奈何六十老翁走
萬里而不息乎遂乞骸歸鄉評推重隆慶之元虜入

犯境捐金佐治城堞大旱倡立義倉縣令坐信庫金
非其罪爲代償令得去

廣南府知府劉先生客傳

王祉嫡

余讀往史傳不可勝舉而良吏卓行代不數人豈實
惠清操出於真誠不易得歟然而二者有一足爲世
重而兼之尤難蓋理人持已爲道雖一捐循孤介爲
途則殊天之生人若專一以成名者勢使然也余於
劉先生旣歎其才之兼又知其事之審淑而作傳庶
幾附有道之碑云先生名容字汝大汝寧縣山人也
生而恬憺無所好成童時動止一以禮教經于叔祖
東東發解中州行誼爲里人重而尤自人倫空每撫
公謂族中人曰是兒他日不但功業顯當以令德著

借吾不及見耳自是邑人稍稍奇公而公益韜晦嘗
慕徐孺子非力不食之義習勞甘苦刻意向學二十
娶姜氏以公貴封宜人閑內則與公相敬如賓人擬
之冀缺梁鴻而家貧居恒教授以養父母父母安之
每舉筋歎吾食藜藿不知列鼎之爲美也嘉靖庚子
舉於鄉上春官不第從遊日衆青袍草履寒暑不易
坦夷不校人望而親之嘗之館塾無賴子醉冒公遜
謝不已久而方解次日里人共責無賴子非人哉則
爲犯劉先生無賴子悔恨欲自經竟逸去公友愛其
篤二弟宋官授室治生讓先慮與之而別於茅屋于

其側里之閭墻者往往感化時諸邊缺馬大括郡縣
不惜重價人競趨之公若不聞也者令鄧君雅敬公
又憐公貧密以語之公謝曰我無馬鄉人共知今又
有馬乎姻黨被誣乞公居間公諭之曰吾人處世所
恃者天道神明而已爾誠誣人卽不直神亦直之奈
何舍正路而鑽別實令聞公言乃白誣者公不喜女
色友人疑其矯強飲外墅而先寘美姬于空室夜分
各寢一所謂公好靜宜居此鋪戶去而姬出公危坐
待旦天甚寒姬啼公以衾與之終不一顧友人大息
曰坐有魯男子而吾不知何云交厚哉公遊南雍宿

正陽主人婦少而新寡夜就公婉轉誘之公作暴疾狀呼僮篝燈煎藥昧爽馳去僮爲人言公終不洩也已未父母相繼卒哀毀逾禮令陳君造廬慰諭摘禮不慈不孝之文示公矍然汗下始有起色辛酉禔除矢感風木不赴公車或曰公不忍仕是也如夜臺未沾一命何公又矍然汗下跨一蹇驢去試復不利謁選判黃州抵家而妻宜人卒公泣曰此與我同辛苦事父母者父母不及祿養而宜人亦以荆布從之吾何忍再娶且有牛衣鹿車之誓矣營葬畢單車赴任黃號難治而公專催科適負至二十餘年公務以至

誠開諭不事鞭笞爭先輸納他郡糧不完及錢穀焚
燬亦以委公立辨監兌蘄州黠吏悍卒相戒斂戢公
布袍蔬食不殊寒士人或風之公笑曰惜福殲行吾
自甘之不知其他也自是廉平之譽孚于上下薦刻
旌牘莫可殫紀乙丑景王柩回京中貴人僕從橫甚
兩臺以下凜凜恐獲譴公力任之中貴人素聞公名
持其青袍歎息嚴諭其下無所投擲臺徐公謂其屬
曰吾儕嫉閹宦如仇畏之如虎每每激而取禍觀劉
君事良愧矣居久之擢同知府事以收賂朴夜泊蘄
洲賊拔刃突至詢知爲公叩頭謝過仍衛送出境而

在村之警稍靖副推僉臬者數黃人恐公去環訴兩
臺竟從民情不違奪也隆慶改元籍沒陶氏公當其
事無一波及守缺例入覲一篋自隨見者垂涕公任
既久操愈厲而吏事益習漕院檄造運艘數十工竣
而洲涸百人推挽屹然不動相視無計公命通一小
渠布以田間淤泥數人曳之利涉如川遂達江潯癸
丑擢南戶部員外郎任黃十一年矣士女攀臥號哭
之聲震于原野爲立生祠歲時伏臘若水旱疫癘禱
以虛日公抵白下未幾樵關武林公私稱便久之值
滿考堅欲乞歸少司徒汪公曰知君志不可奪顧不

爲二尊人地邪公又覆然汗下貸十金行時銓曹二
人一爲公門生一爲舊部僚屬公少需常有顯陟公
不謝亦不辭而去又久之擢知滇之廣南公貧旣不
能行又疾作懇疏乞休上知公非矯特乞致仕獨
居索處一榻蕭然親知勸公爲主償計公流涕曰老
而再娶是曰昏悖其賢邪且有累如不賢敗德破家
所不忍道吾卽忘糟糠約可以四十年苦行頭陀萌
還俗念哉公俸入盡散親族至不能舉炊陋室湫隘
不蔽風雨讀書課子泊如也每出仍布袍草履婦人
小兒見公來亦斂衽起里有不善惟恐公知絕迹公

府達官貴人遊匿不見式廬造請亦不及公府事也
壬午大慶覃恩進中憲大夫甲申五月痠疾大作猶
手一編寘牀頭談諸子甘貧安命毋爲市井計六月
三日索湯飲訖就枕少憩立時盛暑顏色不變人咸
異焉公自少至老無一戲笑語無一欺罔事誠之所
積人自感孚使大行厥志雖不能盡挽澆漓而實心
實惠視智術駕馭者當必有間乃止二千石而又未
見諸行事也惜哉公奏績入都余謁旅舍見其行李
飲食忸怩累日不能出及余癸未使旄道經羅山公
與余談四鼓始別僅歲餘公捐賓客古人不可見得

見公私自厚幸乃不及朝夕侍側爲觀法地而又奄
化恨如何哉公之計也識與不識莫不悲悼其祀諸
鄉賢亦未如往例覆勸邑稱健訟近渝善俗桃李成
蹊有味乎其言之也嗚呼余以良吏卓行克兼于公
至于爲孝子爲義夫未之及也公之甥袁生梁爲余
表弟而公季嗣登瀛孝友行誼有父風哭請曰先君
生平不近名惟是一二苦心苦行恐子孫不知墮清
白聲屬吾子紀之藏諸家廟惟吾子圖之余歎歎不
自禁歎曰祖嫡何人辱先生遺命如此昔人薄感恩
而重知己使余爲諛爲溢何以見先生地下迺按狀

與門見之真略其微細列其大都作劉先生傳俟他
日修史者採焉

雲南臨安太守齊公柯傳

羅治

公諱柯字文則號恒省爲南昌漸嶺齊氏而族有籍于鍾陵南昌固世縣也公生而穎慧兒時瞻視端凝屹如鉅人而受氣甚薄體孱弱若不勝衣獨沈酣枕藉于經史之間沛而爲文若走建瓴之水而決江壘河也十八補郡庠弟子大爲督學晉江蔡公所器公在庠序用禮讓相先遇齒長于公卽道路一揖之頃務爲折節曰此我丈人行也遇公同儕進退先後不少踰尺寸御史羅雨巖公者公先輩也公方弱冠試場屋而羅公尙處棘院外明日羅公歸公爲執蓋提

候被送郭門殷勤爲別而諸暫得意之徒氣蒸一時
視羅公茂如也未幾上元許公視學南昌聞公文持
冠其曹偶而士論共推公年少謙讓可風薄俗受上
賞是時公品高望隆文益淵微入理窟乙卯舉鄉計
偕而北會分宜當國特慕公厚幣延致訓世蕃諸子
而分宜諸用事家人嚴亮嚴鵠一時狐假鴈張來往
縉紳間諸貴人畏口語者反暗憚之及見公固說爲
恭謹公自是坐閉深院外事盡討不聞日斤斤引繩
墨化誨諸子攻文讀書至莫能窺公半面公亦尋厭
別去分宜敗株連遍天下而公得奉完節清名舉世

高焉公先後七上春官而家愈益貧初授和州學博
務先道德禮讓而次及文稅復倡講學之會風聞遠
近學士大夫不憚百里造公印可各俾有所得而去
州守李公渭陽公修和志公于山川風俗田疇戶口
之外孜孜傳廉吏紀鄉賢勸人正士節婦烈女三致
意焉公在和屢勤薦疏明年會試竟不第陞溫州瑞
安令瑞安在浙溫台之交濱海爲巖邑最不易治公
甫下車興利刷弊諸不便于百姓者一槩裁以已意
邑故無公費而有沙稅名公費歲入不下千金悉罷
之自是疲民少蘇邑中田賦輕重難平或田廣縮稅

狹而反溢稅者歲屬丞尉徵收民益苦之公爲建丈
量之議請監司郡守親爲履畝握筭登籍以記無有
漏而以田額之羨餘實田額之不足而供應諸費悉
取俸祿父老有持雞子杯酒獻者公笑而遣之自是
創爲畫一官無擾民民無逋賦于事便又奉檄入平
陽一如勘瑞安故事未幾新例下大夫天下名田二
邑獨從容按故籍對他如治河以興水利知有貧民
不知有大豪訊獄以雪冤滯知有平反不知有成案
居五年以卓異召公瀕發之日三老子弟傾邑而出
都亭遮道萬人呼號懇留至曉塞微車不得前公徐

出涕曰我去而繼我者獨無良牧乎且我德薄父老
何念之深也邑人爲公建生祠而與前令吉州劉公
竝祀號二賢祠云公入都下主長安門民家出入隨
一蒼頭囊中有時或不能名一錢至一切請謁問遺
公實不省何等或擬公大質直少脂韋卽首不及臺
中或次當列郎署而僅僅擢評事大理公不爲意日
佐大廷尉讞罪囚鞠大獄一駁一訊持平而無少撓
而又非斬斬無餘味者至衆所不敢直于大廷尉公
每一一得白之銓部楊公盧公往察公賢又以公久
在散曹若重爲公憐遂出公守臨安在滇南萬里實

善地列得乘傳往公至臨安日坐堂平政簡訟兢兢
自己俸外絲毫之間恐少污指公暇閉閣舉觴理水
飄然不知此身之在西南天地也一日少病脾鬱鬱
有槩于心上書兩臺使者決筴請歸而直指李公屬
公洛中所舉士至欲百方畱公不可且語公居郡直
臥而理之而卒莫能奪公李公特爲會題請命于
朝公始得欣然就道顧蕭然而往蕭然而返公以吏
弊不易之心居珠玉多生之地卽所稱一篋之寶可
資數世而曾足動公之一盼乎屬有逖土官者德公
又度公歸貧中途齎重金爲壽公立麾去奈何以是

相浼薄臨安而厚受汝金是謂欲富乎遂頓首曰
賢哉齊大夫南人不忘公矣公歸而白袍青巾逍遙
里門之下念無所事獨有所乘車鬻之不可焚之無
謂卒推而贈其女夫當塗令之子敝廬薄田悉守舊
物其逝也幾無以爲敬大抵公生平踐履清修語言
篤實獨行之影不媿夢中之諾必踐公在仕宦寧爲
廣州過矯廉之處默公在學問至爲鵝湖不立高論
之伯恭長貧庶幾于黔婁而貴稱二千石直道無忝
于柳下而仕免于三黜者歟

大理府同知彭君鏡初墓表

楊 廉

君諱鏡初字孔彰後易德昭別號龍山道人其先祖楚之麻城人始祖諱啓宗遷蜀定居嘉定曾大父諱紹經大父諱惠父諱伏緣母曾氏繼燕氏尚氏君領景泰庚午鄉薦三試南省俱報罷既而懲癸未場屋火且欲得祿以爲養乃就胄監資格釋褐通判池陽職掌稅糧凡其施設有出於催朴外者民多戴之厲志以居官三事爲主丁母曾氏憂卽日解官奔喪或云三峽秋漲宜少需君不聽布帆竟無恙服闋通判漢中值民饑時余肅敏公爲巡撫以君爲才凡賑恤

之事一以檄君有奸人稱張都御史糾衆爲亂所過
受詞密捕得之餘黨驚散有盜剝髮詐爲僧巾痕隱
隱有挾妖書以惑衆竝廉得之以置于法丁母燕氏
憂服闋通判平涼民饑艱食視昔漢中尤甚公私掃
地僅有藩封祿米預儲民間者借以俵散有謂宗室
固不急此然乘時糶之可邀善價今如此則然君欠
君不聽未幾田鼠害禾稼市有虎輒傷人定爲賞格
使人捕之乃息滿九載進二級同知大理所隸多土
官舊俗謁見有儀蔭襲有饋雖知取千亦多因仍
君一切峻却之時見素林公爲憲副最惡賦吏特禮

重君瀕歿尚鬼公所至必毀淫祠海上有獵神頗著
靈異君以公命竟往毀之方航海高浪如屋從者膽
落君獨無所怖已而風止水靜卒事而還歲旱禱雨
輒應雨足禱霽亦輒應異教有名能驅霆喝風罵雨
爲人所信向者屏之弗用崇重學校作興人才尤加
之意弘治庚戌五月二十八日以疾卒于官享年六
十有三卒後或以公帑不清爲言會憲李君輒按部
考驗得其正數外羨餘百金封議如故乃歎曰是且
不取可厚誣耶遂以羨餘爲君賻後題其銘旌而去
君蚤歲食貧服商賈以供薪水勞苦事畢身任之嘗

以戶役當給事公府恥不欲爲百計脫去聞御史陳
某素號明經擔簦負笈往從之學每讀書一巨桶中
以禁出入力學無寒暑間至忘寢食父性嚴厲有過
雖冠帶必勇受杖責嘗迎養官下比歸請爲輸粟以
贍仕服轉大理堅欲終養父命不許乃行處弟怡怡
然或忘繩檢必加戒諭造燕私器服必以均之視弟
之子如已子父爲族豪所陵事豪彌謹卒能有所感
動與故舊厚來索遊者必滿其意與之盡懽而別有
父卒于漢中去家三原不能歸乃津遣之王端毅公
甚重此舉謂古人麥舟不是過戚里有負官錢者爲

之假貸以輸雖累償無悔其周人急難皆此類家居
不以造次廢禮盛暑中未嘗短衣單葛退食自公必
課諸子學業多至夜參半素爲余肅敏所重至易其
字以屬望之在仕途守直道未嘗干人雖於肅敏亦
無所私謁云

新興州知州高斗南轉

高斗南字拱極徽州人體貌魁偉語聲若雷聽者敘容才識明敏慨然有遠志國初以州司薦授四川定遠知縣惠政多方百姓感頌至爲謠白江上高樓鼓角鳴至今吹出斗南聲自從來作公平吏多少人傳去後名三載考績以他故下刑部獄定遠耆民劉興等相繼奏其廉能公正太祖知其賢而赦之復命知定遠且賜以錦衣紵絲表裏袍帽金銀筵宴時舉天下廉宮數人斗南在其中語具彰善勸聖政記可考也九載最績陞雲南新興知州德政爲新興人所

內舉
親避

獻徵錄

卷之一百二

車

愛戴不異定遠時居數年以衰老乞閑上疏薦子向
以自代上允之厚遣以歸年七十而卒

昆陽州知州譚公讓傳

孫宜

敬皇帝末年治化熙洽人文宣暢海內材行瑋碩之士彬彬盛矣當是時華容人劉公大夏王公儼次第入爲公卿而諸郡邑吏著者則又有慎齋譚公譚公爲人椎樸長厚寡言咲重然諾其所接遇卽驕子弟悍諸父輩莫敢犯者然又敏才瞻學明經義能文章自爲諸生至舉鄉試咸以此師範邑人故邑人今尚稱譚先生譚先生云弘治乙丑譚公爲江西南昌府通判南昌者郡之壯也多宗室長官大家具民險狡好負而通判職綱稅糧譚公顧一切謝却賄賂寔包

代責民親輸郡舊好進囊裝求假輸期譚公與樂飲
訣誓不再見而案舉常籍賄隱匿者悉入官以萬計
質表京師舟將發投匿名金甚衆譚公不啓第命吏
拾棄水中已投金人競網取之爭多寡訟官於是人
始知譚公有異政云譚公爲南昌二年駸駸顯矣會
裁冗副貢譚公改而爲浙江衢州府衛政初尚嚴厲
夜有書廨壁者曰虎豹在山雷行於天人宜自度不
可犯譚譚公顧視笑曰爲政不能使民無犯而使不
可犯邪更治簡緩民愈稱頌居頃之浙江山民與江
民相侵殺傷有司莫能決朝遣刑吏按之益不易制

以譚公至未月立解攝府事禁嫁娶論財罷不例權
會寬租稅減土木平繇振學咸有經紀開化江山今
缺民請監察皆願得署譚公監察委譚公開化而別
遣署江山江山民遮道訴留車不得赴譚公遂兼署
兩縣當是時姚源賊號二十萬爲園陳出沒開化境
而譚公又新署也然譚公頗能嚴部曲謹烽燧招拔
距士置戲下爲禦賊計賊多譚公南甘所撫人者至
營不攻而語譚公所部曰此故父母善吏何可忘也
迺騎速過竟全其營譚公既有禦賊名未幾以檄往
禦壕嶺西寨賊至嶺題版樹所築寨曰譚某築賊見

題因復不攻而破他寨入之譚公乃帥兵殊死戰斬賊首三百馳還開化初譚公與賊遇也以兵少問道避深山中山巨室方楠見譚公而泣公怪問故楠曰僕有五子賊起悉報爲兵而公僅留其二今二子戰雖歿僕未嘗無子也且公素撫開化有恩惠民不忍棄公卽欲破賊山多獵家皆公故所免勿爲軍者僕請爲公招之乃持公手筆遍示得七十餘人遣力士二十餘人夜直入賊臥擒殺其首賊驚以爲大兵悉至因奔散於是譚公始得脫而破賊又嘗以檄往城常山議貲百萬譚公曰取石於山斷山砌石省薪免

覆築厥益并焉官不私財役不私力事不米益民不
侵牟夫如是何百萬之爲也常山城二月而就卒無
橫費譚公積功能久僅遷爲雲南昆陽州知州至昆
陽謂夷裔少文難治以邊幅則令諸生日執經受業
解中凡視事罷譚公坐上座諸生分席起問難決剖
疑義罔不精當上遣使至州例假公務獲原貲始歸
譚公令微給薪黍禁不得進謁督前件惟移檄者理
報遣使者顧反緩理於諸使人咸不顧昆陽行省臬
官薪芻故辦是州民病樵採轉運乃悉數民死傷者
申罷其事其他政大率類此譚公居昆陽三年所疾

固請歸歸四年正德庚辰卒年六十譚公名讓字汝卿

論曰譚公肫肫然醇確君子也今制科極於進士高位美秩多逮焉自貢舉行非是科者卽夙學殊材懿行善治其能致位公卿牧伯益什一鮮矣故譚公雖以文學治行稱所歷僅若此不謂時之限然邪往予嘗語邑諸弟子員舉鄉賢非譚公不可諸弟子曰譚公位卑嗚呼鄉賢以位邪位卑其人卑邪生以不進士限之死也不高位棄之邪斯益可以觀譚公矣

涪益州知州林挺春傳

順德縣志

林挺春者順德縣人也字少和一字元育從湛元明先生遊事親孝藩臬皆旌其門挺春日事親若曾子可也舉而律我當伏不孝之刑奈何以爲嚆矢隨屏去之以舉人教諭仙遊仙遊故有田租掌教多侵漁挺春悉散諸生嘗自作籩豆禮器或謂有主者曰學佛乃舍其身吾何惜鎚銖而儉夫子遷知零陵調南靖南靖兵燹後官寺里屋一空蒿藿成林白骨滿野虎豹晝行挺春芟穢掩骼驅虎豹而遠之倚茅聽政已洪水至城郭蕩析乘桴露處乃遷于大帽山下邑

焉漳經界不正自朱子已患其然今尤甚富者割倍賦之田無直以啗貧民貧民利而從之既賦日積縣官受其病挺春悉問富者招流移撫凋瘵南靖大治稱之遷霑益州知州以親老不赴挺春醇謹自莖仕至老未嘗一介取於人罷官益貧人以是重之

雲南北勝州知州潘叔子絲墓志銘

汪道昆

志曰於乎此故州大夫吾友潘叔子朝言墓也往歲
夏四月十九日朝言卽世今歲冬十月二十有五日
諸子廷訓廷讓廷試廷謨廷論乃始舉喪墓在欽北
之團田卜癸丁吉則余嘗預聞其卜矣諸子有事封
樹抵余志而銘之初朝言受室吾宗舉宗快得佳公
子爲子壻及余從朝言入博士舍諸博士快得佳公
子爲諸生公子名絲尚書且叔子也尚書公起家婺
源世多顯者尚書公旣免居郡乃舍學官勿獨叔季

從迄今守尚書公祀遂占籍郡下邑爲郡中人尚書公故納楊氏姬京師出爲樵陽守癸未楊舉子乳而命之曰樵髻從尚書公之官尚書公出行部所親介部下材官私覲叱弗與通比趨庭終不以得親而淪婉婉歸受尚書公命入山讀書中道飯故人家日且暮止朝言宿朝言亟遣人請命尚書公所然後許之卽出比鄰不告不敢舉足母楊以翁媼獨無養念之深朝言走豎子逆翁媼京師期而待之京口會舟人疫戒勿入舟朝言卒同舟奉翁媼歸母大喜旣又以翁媼且老無子男力請翁內一姬生子惟鑒翁媼旣

歿則惟鑒同諸子起居既冠則正席改事之曰吾舅也尚書公既捐館舍朝言從伯仲執喪尋匍匐京師上書請卹資斧悉已之自出無預諸子舍中伯仲奉嫡母程淑人終故邑程馮几而訣伯仲獨惜不及見絲季弟綸蓋與朝言同母綸彊幹諸錢穀出入悉屬綸獨修尚書公遺事而代其終諸齋用悉自任綸乘間進曰昔人恥獨爲君子將令綸終不得爲先公子乎于時客奉滋煩綸倍朝言而陰助其不給綸中道歿朝言如失左右手拊二孤宿帷堂語諸子曰季絕口不言二孤謂吾在無庸託耳二孤卽吾子也於是

諸子以陰助客奉告悉歸二孤朝言魁然類尚書公
英氣勃勃雖在逢掖屈首受博士書顧虎視鷹揚喜
兵法故從外王父楊翁受射已復從山東樊氏受槍
居常慕汲長孺馬伏波爲人慷慨自許每中夜不寢
拊床奮呼大丈夫不死龍鱗則死馬革等死耳寧能
瑾戶與昆蟲俱死邪嘗單騎北游行劫者遮道抽敢
矢下蜚鴈行劫者辟易避之嘗客胡督府行間督府
請虛中權以待公子朝言佯諾卒拂衣歸嘗從督府
觀潮聞賈豎子以衝突坐軍正賴朝言力解罷之旦
日賈豎子奉百金爲朝言壽朝言謝曰督府之德也

絲何有焉及督府逮行郡中故附督府者率反噬以
避連坐朝言躬言督府諸子於獄極口誦督府寬會
羣盜千人入婺源且薄歛斬將奪石門入壁洋謝郡
守相言直指使名朝言謝不往使者曰生行亦贊幕
中畫耳非直以衝鋒破敵望生朝言作色曰生非衝
鋒破敵之難難於越俎使者曰此父母國也毋辭朝
言勒壯士六人與俱視賊方嚮笑曰彼張欲渡渡則
境內殘矣吾其先薄之彼岍奪其志而扼之就河濱
得小艇三部分六人爲三艇朝言當賊壘進艇二艇
鵝鵲從之賊乘勝無前軍視六人猶六鵲也且退飛

矣將濟朝言引弓一發中朱衣酋賊大驚已而遁中
數賊賊辟易退保故營旦日則一悍夫率旗且用人
襜褕旗下作氣以示必渡怵我軍朝言更一發殲率旗
旗什已而殪首襜褕有則其次酋賊悉衆趨下流計乘
虛可渡下流業已有備朝言復引弓當下流賊且卻
則躍而登岍從之諸軍乘勝遽登賊踉蹌遁出境部
使者聞捷則遣材官勞朝言既班師朝言儒服入謝
使者避席曰偉哉國士直將右魯曹劌而左之夫以
一矢遙聊城視魯仲連臧矣朝言謝曰即使君不以
越俎爲罪鯁生何敢以天幸爲功都人士旣壯朝言

且益多其不伐卽朝言以用武著顧惟修行爲兢兢
居家則父事簡肅公居鄉則嚴事江方伯民璞周遊
而求先聖之道則師事大司成安福鄒先生太史毗
陵唐先生吉水羅先生太常宛陵周先生相友而莫
逆于心則兄事秣陵楊道南焦弱侯自惟骯髒負氣
務折節爲退讓爲春容故受知督學周之君置高等
而縣諸生方願靜顧居下朝言言之使君願以身下
之旣復以講道受知耿使君使君方以礪行主功令
按七校之士輒首朝言古者薦士則賓于鄉乃今羣
之諸生非所以待不羣也潘生三物具矣其幣聘之

以待賓與且授之廩朝言力謝曰明公廩士以講學
或者將驚空談廩士以循名或者將市虛譽是一絲
不足以爲多士勸而適足以爲多士懲惡用絲也使
君益高其義徧檄南國而廣厲之卒于廩會有例當
補貢使君復屬朝言朝言操嚮者言辭益力使君不
許卒彊應之既上太常廷試第一頃之就選部余方
奉使行邊竊計邊邑多瑕安得文武具備如朝言者
爲之保障遂移書朝言都市行且籍君名奏之朝言
力謝曰明公不善俯而詭隨不肖不善仰而過望脫
明公內稱不避爲囚莽私夫人或不能以不俯諒明

公又安能以不仰諒不肖大司空朱公故爲婺源令
雅善朝言朝言得判嚴州乃始投謁蕭御史出按浙
習許司成司成謂朝言國請紹介而見之御史朝言
力謝曰下吏禮當見固公見之茲藉太史公先談則
私謁矣御史法在無私絲何敢撓御史法嚴州邏者
數爲暴法其太甚者十餘曹上官以爲能邇署分水
建德二縣事所至問民疾苦笑其便益豁分水僞增
者千丁損建德歲費者六百舉繁爲令俾世守之所
部檄朝言督歲幣則歲幣良督軍儲則軍儲足然於
工家繇戶無預秋毫坐不肯筦庫吏賀稍溢朝言

率自取足無所覲覩戶部檄藩司補給之邵弗受會
未疾作旬日始瘳竣事而還輒上書請老所部急朝
言甚書八上始得歸然猶以使事行計且擢去無何
檄至得北勝州越明年戊寅疾竟不起春秋五十有
六耳方其少而嘍咭翩翩乎節俠哉旣壯而論兵卽
衛霍安足道也中歲學道奉其身以禮義之塗推之
後則獨行引之前則卻步嘗耿使君譽故大宗伯不
亦有道之士乎哉使君領之曰然其人則天下士也
惜未聞道耳朝言爽然自失退而負墻吾平生擇地
而行去道則猶千里不幸而不聞斯言也吾其以索

埴終疾且深顧語諸子吾終身誦法孔孟有味乎其
言者兩端居常則曰志士不忘在溝壑遇疾則曰死
壽不貳修身以俟之惜躬行不逮耳藉今天假之以
年佚之以老吾安知其所稅駕哉銘曰仲尼之徒厥
有兼人浮海得師治蒲得民有勇知方信而有徵取
材則拙用壯則羸始以稅冠終焉結纓堂而未室大
有徑庭伊人後死先民是程則其威敵俾有善經則
其附衆俾有賢聲藉今竟其所施殆足以治千乘而
行三軍至若折節強學退讓恂恂謀不出位力不讓
能雖曾氏之所畏姑舍是而晞潛心借曰未逮殆庶

幾乎今之成人

潘朝言絲傳

澹園集

朝言婺源人姓潘氏名絲然都人皆稱曰朝言蓋其名聞於世而人知朝言者多高其才能至其忠孝廉節處窮達臨利害無愧於古人矧稱朝言者未必盡知之朝言爲人倜儻負奇氣狀貌雄偉音吐如洪鐘父尚書母楊氏能委婉中其驩心母弟綸尤相得雖甚其孝友蓋天性也少讀書飛布山攻苦力學足不踰戶限一日自念曰士不兼文武不足任重吾齟齬老此奚爲間走燕趙吳越從四方賢士大夫遊洪

都鄒謙之羅達夫毗陵唐應德宛陵周順之皆身傾
下之時執贄請益焉尚書節制兩廣時朝言出入軍
中已習知兵事而外王父楊以射名朝言盡其指授
已復受拾法青人樊東川已復聞武經古陳法旁采
將傳星曆風角諸書躍馬彎弧慨然有鞭撻四夷之
志矣溫處故多礦大盜往往竊窺之而婺源多山箐
可嘯聚急則常竄伏奔呼鈔略以苟旦夕嘉靖乙丑
春浙東礦盜起糾合亡命千五百餘人抵婺源放兵四
掠指揮王應禎等死之又明年入歙六邑洵洵部使
者強起朝言朝言至屯溪望見賊策曰賊渡矣渡且

爲一郡患乃率兵要擊于河兵稍卻與劉會者六人
拏舟抵賊所緋衣者跳踉出知其魁也射殺之賊爲
氣奪又挑其尤桀驁者數人射殺之皆相顧愕眙稍
稍自引去明日賊奮兵戰旗甫出射之什我軍驩聲
動天人人氣自倍渡河大破之又明日追射下流破
之又明日伏烟村渡邀賊歸路前後八陳而所向無
不意得者賊泣曰吾目中久無欽州今竟落儒生手
乎朝言旣以孝弟聞自是指顧而全六邑名聲藉甚
守令博士弟子僉謀官朝言上之督學御史御史爲
楚耿先生雅重朝言亟超格貢之選嚴州府別駕至

權知分水縣縣喜訟大者斧斷細者縷解吏從旁睜
視不敢吐聲氣又丁戶多浮額民苦之乃鈎稽故牘
去虛丁以千數三月而邑大治頃之移攝建德建德
聞其來謹曰此分水所勒石頌之者邪而朝言亦以
治分水者治之蠲歲征八百有奇刊爲額下之鄉民
民大悅有瞽貧令子售基地於姪子死訟奪之朝言
知其奸念其瞽也好謂曰姪誠爾負券業已成矣我
以俸金爲若直瞽行至門反輸情自服曰寧死忍欺
明府其服人心皆此類也朝言賢名日蜚蜚起當路
欲薦於朝屢矣已而竟不薦丙子部運長安邸當日

拜走仰望階下鬱鬱不得意疾作歎曰吾上不能高
臥巖壑自全天真次不能感會風雲雨澤萌庶外不
能策勲龍沙之北內不能批鱗人主之前而洞風塵
以死也因上書自免去監司部使者共惜之然以其
無資地不肯早推挽尋以北勝州刺史就家起之而
朝言死矣然則世之稱朝言者於其材能亦未盡知
也初朝言歸母夫人尚無恙而弟綸以物故朝言經
紀其後人無異已出病且革母氏在旁淚淫淫問不
下聞鵲聲陽曰鵲噪其有喜乎益不欲以已故傷母
心也與人交緩急可託意所嚮往皆海內賢家長者

而咋舌決齒於媚嫉之夫如豺狼不欲近每一縱言
目光橫射意氣竦激聞者或不能堪揚揚自如也晚
既有聞於耿先生以謙之達夫言參驗之仰鑽益力
生平所欣慕澹然不以屑意雖未見其止而志固已
遠矣嗚呼豈不明於趣舍尚風節偉丈夫哉君子之
爲善也不赫赫于時其流風遺烈在乎人者必有時
而著故余傳其事俟知言者考焉

黃生
諷諫
棕棚

鄂嘉令虎臣傳

虎臣麟遊人自幼慷慨直躬與人寡合凜有氣節不
規貨利成化末以歲貢士入太學時適憲宗於萬
歲山起棕棚登眺臣具疏極諫時祭酒懼禍延師長
以銀鎰繫臣堂樹上俄有官校宣臣至左順門中官
傳溫旨勞曰爾臣言是棕棚即拆去所上疏留中不
出毋用該部復奏也祭酒聞而大慚自是臣名遂聞
天下先是陝西巡撫鄧時具疏請賑難濟疏入臣請
往至京既上疏詣吏部戶部泣而言情辭懇至諸大
臣咸動色遂大獲賑焉其語甚壯至今人猶傳之諫

棕棚時旨許選時授七品正官後選雲南楚雄府郭
嘉縣知縣卒於官人甚惜之雲南沐國公贊曰魏魏
畫臣文林翹楚烈烈忠良芳垂萬古楚英雄姚鵬詩曰
一寸生平爲國憂幾番獻策在皇州只期事業垂
千古豈料形骸覆一丘青史有名書虎氏錦衣無路
耀麟遊老天不祿忠良士致使無窮草木愁

徵學

昆明令賀君朝用墓志銘

王升

賀君諱朝用字道亨竹窓其別號也其先楚之湘潭人後徙蜀之綿竹遂爲綿竹人高祖才國初時戍於茂因家焉祖綱正德間奉符征流賊奮勇殲渠魁廖麻子輩數人被創以亾督府幸慈彭公特旌其門父伯時娶於湯而生君幼穎異隨羣兒嬉戲時露奇賢有古人取瑟擊瓮風稍長善詞說樂詆諧澗達不拘小節年十三從父來行伍偶督戎萬戶以法繩伯時君負氣銜憤矢志棄儒聞王墨王太史之賢躡屣往從之遊太史奇之已而晉膠庠試輒先諸士七入棘

國無所遇乃循資克壬子貢四十餘矣卒業北雍暨
守選凡一紀甲子歲謁選天曹授景東衛幕人咸爲
嗟惋君素精數學逆知爾爾怡然自得也蒞任甫三
月值土日鳳繼祖之變全滇騷動撫臺呂瀾滄兵憲
揚聞君有異術爭招致帷幄待以殊禮與共飲食不
呼其官凡天時地利軍旅之事必諮於君而後行尅
期執俘不夾鎗銖尋令督捕白崖盜盜盡得故田按
院薦章有懷奇蘊深政績顯著之語三年復督加迷
渡君以數占之生擒巨盜數十輩知不可悉誅諭以
大義令其自新釋之去於是萬徑之賊聞風讐伏稱

爲神明誓不犯境時與本道朱約所公論事不合君
無所統委公怒叱之君卽起拜曰烈士雖窮壯心未
已身可殺不可辱自此不復得爲門下吏矣公曰止
之不從與妻孥跨驢徑行入省下乞休會右方伯陳
公大叅朱公聞其賢挽留之使人於潮滄廉訪其事
約所公亦悔之馳書歷道其賢大略謂清貧苦節任
勞任怨不宜聽其去也白於撫按陳烈二公遂不允
其辭已而試以事無不奇中二公深器異之體貌有
加焉適宜良尹以卒去俾往署其篆發摘奸伏若神
江右人倪丙二商於宜良一日出不還同舍聞於官

君密占其人已殺屍水中顧水浩漫無所取屍乃沐浴禱於城隍令三日出屍至期君行至水邊命善泅者入水探之未獲通邑人列兩听以觀俄風雨雷電大作屍果浮出邑人大驚君問商素所往來有楊連者其故交也命取其家一童子訊之具云丙二久通連之婢連知之不問是日丙二瞞連出亟如楊氏值連回無可避連慙佯以棒戲敲之本無意殺之也適誤中額死連懼事露乃三束筏繫以石寘水中非雷斷其筏寃不得白君之聽斷皆此類也既乃聞嵎峨二尹之報久之始得代赴嵎峨時丁丑白改鑿

構變臨安張兵憲呈乞兩臺擬添設督捕府其地西
通沅江南接交趾自古蠻獠盤結之所欲擇官相度
而難其人於是委臨安二府金河西文尹嵎峨張尹
以君習知地利且夷人素所畏服俾叅護行事焉甫
入境蠻落萬衆瀾漫山谷呼噪而來諸委官皆驚走
蠻不問獨共扶昇君踰怕念鄉渡爬泥河深入山藪
中引寘高座獠衆羅布岡厓惟酋長俯伏座前聽指
揮君示以某地堪爲官舍令分工刻期刊木治土營
屋一區繚以週垣其外開街道通諸巢箐羣酋稽首
奉命不三月而門堂廨宇秩然嚴整遂爲城市故許

代廷薦語云秉正可比精鋼持已宛如良玉從征延
緝謀勇兼資暑象收糧廉平並著禱神以究疑獄旋
感雷雨漂屍趕賊直入深崖曾致羣首叩首樹自來
不就之捕館馭從古不賓之悍夷此一臣者所當不
次擢用者也癸酉三月遷昆明尹巡撫鄒公尤愛重
之君既視事聽斷益神間里毫髮之奸無所隱人共
以城隍稱之鄉官鄧主政家蓄萬金初有一子聘顏
府同女後子亾主政繼殞鉅業無所屬妻賈潛以帑
物輸於顏將改適焉姪世彥訟之撫臺委官驗之沒
於賈賄模糊復命再委君往一一檢斷歸於姪委官

之賄哇焉顏質各慚懼死是時巡臺馬公謂爲卓異
其薦章有云性稟剛方有百折不迴之氣分安寒約
有一塵不染之操近折鄧世彥之巨家而杜絕委官
之垂涎雖嫉忌生嗔署以下考而不顧屢辨楊東勝
等之疑獄而頓起涸轍之更生卽頌聲載道稱以城
隍而匪虛雄才尤練於兵機多藝更精於數學實心
實政有守有爲自古循良之吏於今卓異之才若不
破格超陞何以激勵將來使君未卽世擢用未可量
也然君性剛褊好直行已志不能習時套妍媸以希
世好俯伏對應多不適上官意且以衛幕拔起爲令

長而被撫臺寵重人多忌嫉之者君亦自分數窮屢以情告蘭谷公乞放歸公曰吾居滇子豈可舍我去耶吾行子乃行耳君受公知遇不得已從之每鬱鬱歎曰其命也夫居無何鄒公被人言而新代巡郭公與撫臺雅不相能嫉君者乘間構之曰賀某恃寵傲物依勢受賄請按之於是君篋衣束書行有日矣適報者止公毋行新院且有後命公入謂部孺人曰數不可逃也吾年逾六十可入牢獄丐生耶又曰爾大數亦至奈何君狹中負氣素以廉自喜一旦被污噉憤不可忍遂自引決部孺人哭曰夫死我義不獨生

且夫先詔之矣亦自決初君蚤歲遇異人授以神術
凡人事之通塞慘紆物理之贏絀倍覆天道陰陽之
愆伏調適咸預言之尅以日時百不失一然君深秘
其術而一假於相以爲言故人以神相目之君之將
赴滇也別其署州事節判溫君而果溫請曰先生茲
遠行何以教我則應之曰祖公萬福但三日後州前
有小變當流血溫君大駭徐曰勿憂非州事也越三
日番人節拐爭於州前果割刃焉幕景東時滇南大
旱巡撫見吾陳公愛之召之相君曰須董太守至乃
可言之陳公曰吾爲一省主顧不如郡侯耶對曰不

然方今旱灾惟雲南一府公之所轄廣矣何可占公
然之促太守至君熟視之曰喜可賀矣本月二十一
日戌時雲當合有微雨三更雷大鳴黎明雨如注非
三寸不止至期言無一不酬公大奇之以書薦於巡
臺見嵩劄公劄公見之曰吾雅不好星相無已姑視
我子息乎君察之曰子宮甚佳已有成名之慶公曰
無妄言君曰九日後佳報且至名列賢書第幾何敢
妄對已而悉如其言君之轉昆明也同筆硯陽宗令
文君嘉謨往賀之君酌之卮酒而語之曰兄亦遷矣
何以無報文君不以爲然君引其臂出檐下諦觀之

曰遷則遷矣而不甚滿意其將有兔園之遊乎文君
不樂而去明日閱邸報不誣君之神術假相以爲言
者大率如是君歷仕途凡十一禩被獎三十七膺薦
者三其卒以萬曆乙亥五月十七日距其生正德庚
午十二月二十八日閱世六十有六先能侯孺人嘉
靖癸亥卒於家繼配邵孺人與君同卒於官君無子
惟侯出一女適生負梅鳳騰君之喪賴同鄉張大叅
經紀其行鳳騰聞計亟奔護及於瀘州扶以歸謀將
以丙子四月二十九日合葬君與侯孺人於某所鳳
騰一日偕其鄉之士夫大尹文君學博周君陳君詣

余再拜告曰賀君不幸卒於外又不幸無子其殊猷
絕蹟可傳者頗多非立言君子爲之紀述將與荒煙
野草同歸漸盡惟公矜而賜之文用勒之石以垂永
永余雅聞君多奇甚思一覲以發其胸中之蘊而不
可得今且不幸死矣銘其可辭爰據梅生之狀以詢
諸文君叙其事而銘之銘曰古稱方伎誰入神偉哉
公明肩景純疇其繼之明賀君三子異世方軌犇牢
籠萬象把乾坤抽玄吐奇精微分物忌多取身則屯
名高千古炯常存後有觀者攷茲珉

雲南府學教授前灌縣知縣周君奕墓碑

張時徹

周君諱奕字叔大號龍泉其先劉姓直隸寧國人六世祖達一生政卿伐外氏戎役因家今姓政卿生德值高皇帝平滇服徙江南間右實之而德曾在徙中遂成金齒家焉實君曾大父也德生茂茂生玉是爲楚峰先生葆光篤行白首不識衡量惠宗恤廢趨人之急乃人人稱說長者嘗夢白象入寢旦而君生質性端懿兒時卽不好弄稍長穎露魁揚亢志青雲之上受經於王天澤邵國賓二先生所盡傳其業沈

覽載籍以春秋名其家弱冠入郡膠每試輒雄曹楊
督學使者唐西洲公大器之擇諸生可者三十人從
之遊章志辨業人知有周氏春秋矣戊子魁省試例
得計偕君以親老罷行俄而楚峰公卒長跼爲訣殯
霍無憾若天翼之也戊戌上春官不第謁于主爵願
以一職自效得四川灌縣知縣銳欲行其所志時浮
川江以往有羽客遺之丹五粒云可金銅鐵君曰此
謂盜天之寶不祥卽銅鐵可金而心弗金矣却而投
之江比至縣縣故當威茂二邊勞兵轉餉踵相屬也
君念曰諸父老子弟太困苦矣欲少緩須臾無死非

天省嗇不可而行之必自令始塊處一齋位之二方
布袍革履口不二味執氣寒素也客謂之曰夫令鞅
掌筭紛劬矣間得退食與妻孥相勞苦齒肥飲醇自
其所資養非倖饗也今若此得無過苦乎則謂曰客
幸憐我何弗念乎不穀撫有嚴邑苟以一身舒百姓
之急卽立禍不恨矣嘗奉檄他邑簡騶屏御疋馬而
行達塗人竊指爲尉史也側席輟食孜孜求民之瘼
與士習汰夷風劬蒙猾子孤軋出大辟之寃卽嫌謗
不避臺檄季報罰金若干者得上考君曰朕民以微
榮人將吐其餘矣卒不盈罰金凡三年而政成當塗

獎其資邑人歌其惠庶幾哉成節桐鄉之治矣而灌
去滇特遠母夫人唐老而弗得將也君私計曰祿不
及養何以仕爲乃上書闕下言治縣無狀乞一本省
學職改雲南府學教授倉皇戒途至不給徒御有一
人以騾十頭輔行者詰之則前所出大辟囚也卽正
色曰申寃吾職也而以貨乎若謂改官而可官可改
而守不可改其人歎息捨地曰獨奈何活我而不得
報之毫毛乎吾負君吾負君遂逡巡而退抵家出其
橐金僅僅七十石田陋室無所改于其舊居之裕如
也雲南視灌同近母夫人猶遠之弗往君乃歲乞一

差而省覲焉差得乘傳給力率謝却之僅免徒行曰
吾以私故僕僕敢多煩郵驛乎時諸大吏益罔不以
尤異禮焉滇故有五華書院督學默泉吳公簡諸生
異等課肄其中命公典之而君嗣紹稷則其魁也吳
嘗以原屬稷而稷訓缺乃父執謝弗廢已而有代視
學政者諷君索賂於諸生君懼而納牒諷者頗銜之
適仰齊胡公至嘉君操執痛沙倖進而卒廢稷又大
而秀雋肄之書院仍以屬君君因心設教隨物曲成
長者必先忠信而後文藝幼者必習小學而戒躡等
儀範端嚴程式具備道本諸身而風行於下諸生之

獲有造者或分猷郎署或表直瑣闥或執則成均成
抽思文陛爲時聞人莫不曰此周先生高第弟子也
九載考績大吏令捧表以行益優之也君曰凡所以
乞便地爲母氏也今益之筭矣遠者當歸歸者更出
乎輒納祿而隱掩扉却掃不跡公府壬子之歲紹稷
亦歌鹿鳴君誨之曰我祖我考穀貽我父子至厚矣
夙夜兢兢惟恐負之汝其念哉嘗言世人服食求長
生燒丹求足用皆惑也寡慾卽內丹儉用卽外丹不
猶愈乎平生刻厲行誼務脫流俗一言一動必準古
人所居家園隣侵之界卽恬以委之凡與人不爭類

如此其鄉大夫周君冕頌之曰在邑爲古之遺愛在
學爲古之名師在家爲古之鄉先生函牛之量圭撮
不足以溢其容逸羣之足尋常不足以局其步人謂
白象之符其信然哉其信然哉君生于弘治己酉卒
于嘉靖丙辰得年六十有八

朝鮮國朝獻徵錄卷之一百二